

# ROM

## Warage o Ayeedek Pól Ol o Joowo Kuture o Kazi Rom

**1** <sup>1</sup> Aneeta Pól o keen gabaren o Yesu Kiristo neen ci kayeedekun igeet warage nico o. Ejerawan Jooi aneet kizi toonnyai cin, ma itoonan ka kook kuuwak kaviyak ogin abon. <sup>2</sup> Baale eterkedek Jooi ol kaviyak cigin abon noko, ma ayeet nyakananeta ogine terkediin nico waragewe onin. <sup>3</sup> Ma kaviyawa nicaga azɔɔz zɔɔz ci akati ɲeerin Yesu Kiristo ween Manyi ona, baal aku aritai dolene o dól o alaan o kazi Devid e. Aritai waanice niini kiyo eeti o deer o. <sup>4</sup> Ma een bar niinilya Jook ele neen. Zin ɲaazi onine baal ɲaani daayiza e eyeliza gi o eene niini ɲeerti Joowo didi o anyak dɔyiz ɔɔɔt. <sup>5</sup> Mazin ɲaaten Yesu anyan Jooi aneet irkente onin deten ci keene toonnyai ci ka kuuwak kaviyak ogin abon ka ol ween moden dook kutuweec nɔɔnɔ, ma azooni zɔɔz onin. <sup>6</sup> Zin igeet ol ci Rom noko ejerawun buk Jooi ɲaaten Yesu Kiristo iziti ol cigin.

<sup>7</sup> Kayeedekun zin warage nico igeet dook ol o Rom o areezun Jooi, ma ejerawun igeet ka iziti ol cigin. Abon bai Jooi ween baatina ki Yesu Kiristo ween Manyi onai anyun deten kibeen ganɔn.

### Anaat Pól Jook ole o Rom

<sup>8</sup> Rak ɔɔwa kanyi Jook zany zaare o Yesu Kiristo ɲaaten igeet dook giye o aziɲni ol loocok dook tuwen unoon atuyu Yesu. <sup>9</sup> Aga Jooi o kaliɲliɲonei naana nɔɔnɔ zinize onan dook ɲaati kuuwaweke ol kaviyak o ɲeerin Yesu Kiristo abon, gi o gɔɔn kaadanun igeet ɲaati kanaryine iinya dook. <sup>10</sup> Kajin gɔɔn naana Jook tup nɔkɔ karoon ka kɔkɔlayan gól ci kako kacinuɲ igeet taman, mate aroonnyan niini aneet kutugu nɔkɔ. <sup>11</sup> Karoon naana kook kicinun ɔɔɔt ele ka kazaaceyun igeet demziin o aku Vɔɲize o Joowo ka odoyit niiga tuwente unoon atuyu Yesu. <sup>12</sup> Ka zin naaga dook kidiziktɔ iitene codoi tuwente onai ɲaati acinu niiga tuwen onan, ma buk kacin naana tuwen unoon.

<sup>13</sup> Gɔɔnɔga, karoonnyun agaac gi oma ce. Karoon gɔɔn kook kicinun igeet ɲinaante lak ci meelik ger, bar anyak gi ci aranɲaninan nɔkɔ been neen. Karoon gɔɔn gól ci kako kaliɲliɲe jurun ɲaatumoon ka buk kivitak ol ogen ɲinaante Jook kiyo baale kaliɲliɲ modene ogen, ma avunak ol ci meel nɔɔnɔ e. <sup>14</sup> Edezeyan zin Jooi aneet gi ci abon kuuwaweke naana kaviyak ogin abon moden dook poda o abaak aturwa, ki ol o abaak tiini, ki ol o aganek waragenya, been ol o alaɲ aganek waragenya. <sup>15</sup> Karoon zin buk ɔɔɔt kook kuuwayeyun kaviyak o Joowo abon igeet ol ci abaaku kuture ci kazi Rom neke dook.

### Dɔyiz o kaviyak o Joowo

<sup>16</sup> Alaɲ naana kanyei alyaan ɲaati kuuwaweke ol kaviyak o Joowo abon been neen, eeci kaviyawa nici gól o aliɲliɲi dɔyizi o Joowo neen ka karogoi niini ol o atu Yesu dook. Baale rak ɔɔwa arogoz kaviyawa ogine ol o Juz doon, bar zin inoko iiya arogoz buk ol o alaɲ eegin Juz. <sup>17</sup> Eeci kaviyawa ci Joowo noko ayelza gól o anyeke Jooi ol o deer dook kobonta ɲume onin gole ci amenan niigi ɲaati atuwi Yesu doon. Azi warage o Joowo ɲaaman ne, “Eeti ci anyek Jooi nɔɔnɔ bonat tuwente onin, arogi niini.”

### Anyak ol dook oɲe

<sup>18</sup> Mazin bornet nɔɲ o Joowo ayelzai, ma akunak looc tamma. Akunak niini ol dook o abaca oɲe Joowa, ma agɔɔn kaal ci ger ole o deer buk. Eeci ol nici golowe cigeecik ger noko alam gɔɔnɔgi koogi calaɲ aga zɔɔz o Joowo een didi. <sup>19</sup> Apayek zin Jooi nɔɔgɔ gerzitin o, eeci eyelek niini nɔɔgɔ kaal o anyek ol kagaac nɔɔnɔ, ma agaac niigi kaal nicoko jurun, bar ɲaan amena niigi abaca oɲe nɔkɔ. <sup>20</sup> Okom zin bodo gól oma ci ka keelai niigi eleeti payiinte o Joowo. Mayo nuun alaɲ acin ol Jook keberene ugeec o, aga niigi nɔɔnɔ nɔkɔ kinatamma laadun e kaale ci baal eenyca niini o. Ma kaale nicoko kaga naaga anyak niini dɔyiz calaɲ atorneke been neen, ma een niini Jook dook neen. <sup>21</sup> Eeci yo nuun aga niigi Jook abil tɔ nɔkɔ o, alaɲ arɔɔɲ niigi kidiɲɲani nɔɔnɔ kizi Jook. Ma buk alaɲ atal niigi nɔɔnɔ kaale o agɔɔn. Ma bar abaaban niigi kaal calaɲ anyak keɲti. Zin giye nico uulalte nɔɔgɔ ooti, ma ɔkoma ɲaatineɲ baabani been neen. <sup>22</sup> Azi niigi ne, “Kagenya,” bar alaɲ aga tarbale o. <sup>23</sup> Otonɲit niigi ɲaati adiɲɲani Jook ween didi o arogi been neen, ma bar avɔ adiɲɲan kaal ci labak alaɲ arogi ci eenycai azeene, ma ayabzonek eet ci deer, karabon een kibaalic, karabon een kelegit, karabon een kowanya.

<sup>24</sup> Oton zin Jooi nɔɔgɔ kutuguzɔ kaal ci ger arɔɔɲ niigi zinzeeti cigeec noko, ma agɔɔnɔ niigi maany kaal ci ger een alyaan ɔɔɔt. <sup>25</sup> Eeci otoweec niigi zɔɔz o Joowo een didi kizi vɔlɔɲ, ma bar adiɲɲan, ma aliɲliɲonek kaal o eenyca Jooi, ma bar otonɲit Jook ele o eenyca kaal nicoko ɲaati adiɲɲani. Bar zin Jook neen o waan abon anaat ol nɔɔnɔ nɔkɔ been neen. Nɔɔnɔ neen.

<sup>26</sup> Zin giye nico oton Jooi nɔɔgɔ kutuguzɔ kaal o ger een alyaan arɔɔɲ niigi zinzeetine ugeec. Yo nuun een ɲaai otonɲit niigi gól baal laadun aroɲek Jooi nɔɔgɔ e, ma bar aɲera gól cineɲ doon ci oogine ɲaa kibeen ɲaa maany. <sup>27</sup> Ma buk ol ci mac o otonɲit gól baal laadun aroɲek Jooi nɔɔgɔ e, ma bar aɲera gól ci oogine eeti ci mac kibeen gɔn ci mac maany. Ma kaal ci agɔɔn niigi noko dook kaal ci ger anyaa alyaan ɔɔɔt ele. ɲaan zin ajowa niigi piryakzet ci agano ki kaal cigeec ger agɔɔn noko.

<sup>28</sup> Zin giye o alaɲ arɔɔɲi ol nicigi kagayi Jook, oton Jooi nɔɔgɔ koneec baabanok ci akom keɲti. Ma agɔɔn niigi kaal calaɲ agano waan ɲaati agɔɔni eeti ci deer been neen. <sup>29</sup> Ma kaal o gerze dook eel zinzeetine ugeec kiyo zinzeeti appinzet, ki madken, ki monyenet, ki danɔn ci adaɲon ki ol, ki labaan ci alaban ol, ki marnon ci amarnin ol, ki ɲomtiin ci aɲomti ol. <sup>30</sup> Ma aduwak ol kaal ci ger, ma amarnin buk niigi Jook, ma adom ol, ma adon eleeti, ma abɔlɔl, ma abaaban gɔɔn niigi tup nɔkɔ gól ci ka kutuguzi kaal ci ger, ma alaɲ aɲole baatigeec ki yaatigeec. <sup>31</sup> Alaɲ aga kaal ci abon, ma alaɲ agɔɔn kaal o aterkedek niigi ol oogi, ma alaɲ alal nɔɔgɔ zinzeeti gonogine ogen, ma alaɲ awucnek ol ogen nɔɔgɔ. <sup>32</sup> Aga niigi zɔɔz o aduwa Jooi akati kaal nicoko nɔkɔ o azi ne, “Ma ol ci agɔɔn kaal ci ger noko agano niigi kibeen daayiz.” Bar apez niigi zɔɔz nico kizi gi ci labak, ma amena agɔɔn kaal ci ger nɔkɔ. Ma atalne ɲaati acini ol oogi agɔɔn kaal ci ger kiyo niigi o.

### Payiin o Joowo

**2** <sup>1</sup> Gɔɔna, mā apaye niina ol oogi gerzitin kaale ci ger agɔɔn niigi, akomnin buk ineet gól ci amiirne payiinta been neen. Bar koca apaye niina gerzitin ele unun maany ɲume o Joowo, eeci kaal ci ger agɔɔn niigi o buk niina agoon. <sup>2</sup> Kaga naaga dook nɔkɔ alɛem Jooi giye o apayeki ol o agɔɔn kaal ci ger kiyo nicigi noko gerzitin. <sup>3</sup> Mā apayeku niiga ol gerzitin kaale ci ger agɔɔn,

maje buk niigalya agoonu kaal nicoko, abon buk agayu akomnuŋ igeet gɔl ci ka katin ivirti payiinte o Joowo. <sup>4</sup> Karabɔŋ bar apezu niiga Jook giye ci ŋaan alalni nɔɔɔ ziniz ŋaatunooŋ, ma alaŋ arɔɔŋ kapayeyuŋ igeet gerzitin kataman o. Abon zin agayu niiga gi ci rak uunnuŋ niini igeet labak o, eeci arɔɔŋ ka kanyuŋ igeet waŋi ci abadu mony, ma uunnu oŋe ugooc. <sup>5</sup> Bar zin mā alaŋ abadu mony, ma uunnu oŋe ugooc, azaacu bar bornet nɔŋ o Joowo kizi appe ɔɔɔt giye o adɔŋni igeet zinzeeti kak. Ma iitene ci katin aɔrneke lɔɔci e, ayselza Jooi bornet nɔŋ onin, ma apak ɔl dook payiinte onin abil tɔp. <sup>6</sup> Ma acacak gɔɔn eet co kaal ci atobɔ ki kaal ogin baal gɔɔn agɔɔn e. <sup>7</sup> Anyak ɔl oogi ci agɔɔn kaal ci abon tup nɔkɔ, eeci arɔɔŋ niigi ka kanyek Jooi nɔɔgɔ titinyɔn, ki diŋdiŋɔn, been roget o abil been neen. Anyek zin didi Jooi tiŋeere nɔɔgɔ roget o abil been neen. <sup>8</sup> Maje ɔl oogi appinte nɔɔgɔ zinzeeti, ma abor ŋaati aziŋni zɔɔz ween didi, ma agɔɔn kaal ci ger. Apak zin tiŋeere Jooi nɔɔgɔ bornet nɔŋa. <sup>9</sup> Ma ɔl o agɔɔn kaal o ger dook apirna katin niigi ɔɔɔt ele, ɔɔwa rak ɔl o Juz, ma vurma ɔl o alaŋ eegin Juz. <sup>10</sup> Maje ɔl o agɔɔn kaal o abon, anyek katin Jooi nɔɔgɔ diŋdiŋɔn, ki titinyɔn, ma anyek nɔɔgɔ kabaayitɔ ganɔnta, ɔɔwa rak Juz, ma vurma moden o alaŋ eegin Juz. <sup>11</sup> Eeci apak Jooi ɔl dook gole codoi tɔr nɔkɔ kotobɔ.

<sup>12</sup> Mā abaca ɔl o alaŋ eegin Juz oŋe, yo nuun ŋaan baale kanyek Jooi nɔɔgɔ lotinok ogin e, apayek ni niini nɔɔgɔ daayiz nɔkɔ. Maje ɔl o Juz o aga niigi lotinok o Joowo, mā abaca oŋe, apayek Jooi nɔɔgɔ gerzitin lotinowe nicoko kadaayitɔ giye o alaŋ azooni niigi nɔɔgɔ. <sup>13</sup> Eeci alaŋ anyek Jooi bonat ɔl o olla azii lotinok ogin iini doon, bar anyek bonat ɔl o azii lotinok ogin, ma azooni. <sup>14</sup> Ma moden a alaŋ eegin Juz akom nɔɔgɔ lotinok o Joowo. Bar mā agɔɔn niigi keeranene ugeec kaal ci abon atobɔ ki kaal ci abon aduwa lotinowa o Joowo, gole nico ayselza niigi gi o agawi kaal ci abon ki kaal ci ger. <sup>15</sup> Ma kaal ci agɔɔn niigi noko ayselza gi o agawi buk niigi laadun keeranene ugeec kaal o abon atobɔ ki kaal o aduwa lotinowa o Joowo nɔkɔ. Ma aga buk niigi zinzeetine ugeec gi ci abon ki gi ci ger, eeci gɔɔn buk iima atalne niigi ŋaati agɔɔni gi ci abon, ma abor nɔŋ ŋaati agɔɔni gi ci ger. <sup>16</sup> Ma zin katin iitene ci apayi Jooi ɔl e, apak niini nɔɔgɔ ŋaaten Yesu Kiristo kaale o ger eel zinzeetine ugeec kiyo gɔɔn laadun kuuwawekuŋ naana igeet kaviyawe o Joowo abon o.

#### Alaŋ ɔl o Juz azooni lotinok o Joowo

<sup>17</sup> Ma niiga ɔl o Juz o gɔɔn aziyu ne, “Keegina naaga Juz.” Ma anyeku lotinok kizi ruguzok cugooc, ma abololu aziyu ne, “Keegina dɔl ci Joowo.” <sup>18</sup> Ma agayu kaal o atal Jooi, eeci edemeztu niiga lotinowe o Joowo gɔl o ka agayi gi ci abon. <sup>19</sup> Ma abaabanu zɔɔz ci aziyu ne, “Keegina ɔl ci kademeza ɔl ween moden rubenik gole o Joowo. Ma keegina tokolec cineeŋ, eeci ŋaan abaak niigi muura.” <sup>20</sup> Ma gɔɔn aziyu ne, “Kanimmnya naaga kedemeztu ɔl o alaŋ agam eleeti ugeecik kodoyit baciinowe, kibeen ɔl o ŋaan kagaac demziin o Joowo juruŋ,” eeci lotinowa o Joowo anyuŋ igeet genyiz ki zɔɔz ween didi. <sup>21</sup> Zin yo ademezu ɔl oogi o, ma rak eleeti cugoocok o maany alaŋ ademezu naa? Uwayeku ɔl oogi zɔɔz ka calaŋ agɔrze o, inoko niiga alya alaŋ agɔrzinu? <sup>22</sup> Aneku gɔɔn niiga ɔl oogi ne, “Mā adomanu zoocmazit o.” Inoko niigalya alaŋ zoocmazit adomanu? Abornu gɔɔn niiga joowane o adilyai aziyu ne, “Gerze.” Inoko niigalya utuŋtu ŋaati aliŋliŋnyu kaal o anyonek joowane o adilyai? <sup>23</sup> Abolulu gɔɔn niiga, eeci agayu lotinok o Joowo. Anyaaku zin bodo zaar o Joowo alyaan giye calaŋ azoonu lotinok cigin o naa? <sup>24</sup> Ayeedi waragewe o Joowo zɔɔz ci azi ne, “Igeet ɔl o Juz ele neen ci anyeku moden oogi komomozit zaar o Joowo kaale cugooc ger agoonu noko.”

<sup>25</sup> Ateedu gɔɔn niiga Juza dɔl ugooc kuli ka keyelizai gi o eeginu ɔl o Joowo. Zin didi mā azuunu lotinok o Joowo juruŋ, teedinet cunooŋ noko anyak keŋ. Bar mazi alaŋ azuunu lotinok ogin juruŋ, akom teedinet nico keŋ kina. <sup>26</sup> Mā alaŋ eeti ateedi, ma bar azooni lotinok o Joowo, agama buk Jooi nɔɔɔ kiyo eeti o ateedi o labak. <sup>27</sup> Ma moden a azooni lotinok o Joowo, mayo nuun alaŋ niigi ateedi o, anyaakuŋ niigi igeet o ateedinu alyaan giye o agayu niiga lotinok o ayeedi waragewe o Joowo, ma bar alaŋ azoonu. <sup>28</sup> Ma teedinet ci alyo doon alaŋ anyek eet kizi eet ci Juz een didi. Ma bayen ween didi o ayselza eet kizi dole o Joowo alaŋ een gi ci kateedi ele. <sup>29</sup> Eet zin ween Juz didi neen o otowo Jooi ziniz onin dɔyize o Vɔŋiz onin. Alaŋ een ŋaaten lotinok baal ayeedi waragewe o Joowo e. Zin eeti nici ajowa niini naatinet Joowa, alaŋ een eete ci deer.

**3** <sup>1</sup> Ma dim inoko didi ɔl ci Juz o titinye niigi ɔɔɔt kujukit moden dook? Inoko teedinet cineeŋ o atirit nɔɔgɔ niya? <sup>2</sup> ŋedet niigi titinye golowe ci meelik ger. Giye baal ɔɔwa rak itoonake Jooi kaviyak ogin nɔɔgɔ e. <sup>3</sup> Bar zin waanice ɔl ogene ŋaatineeŋ alaŋ atu zoozok o Joowo, ma ŋaan Jooi kotoŋ nɔɔgɔ nɔkɔ been neen. <sup>4</sup> Ma ɔl ci deer o dook loota ŋina voloŋnyok, maje Jooi aduwa niini zɔɔz ween didi tup nɔkɔ, ma alaŋ avɔlɔŋ been neen. Ayeedi waragewe o Joowo zɔɔz ci azi ne, “Ma niina Jooi gɔɔn zɔɔz unune ayselzai keleemnyai. Ma anyei niina leemi tup ole o gɔɔn apayekin ineet gerzitin.”

<sup>5</sup> Karabɔŋ gɔɔn ɔl ogen azi ne, “Kaal ci gerze kagɔɔn noko anyek ɔl oogi kicinit bonat o Joowo. Mā apayeket Jooi ageet gerzitin kaale nicoko abac koca niini.” <sup>6</sup> Kanekuŋ zin ne, Akom kina! Alaŋ een neen! Mā da calaŋ apak Jooi kaal juruŋ, alaŋ buk koca niini apak ɔl o loocu juruŋ.

<sup>7</sup> Karabɔŋ bar ɔl ogen azi ne, “Mā kavɔlɔŋ, ma ayselzak vɔlɔŋ cinai o ɔl kagaac leeminet o Joowo, ma adiŋdiŋan niigi nɔɔɔ, naa zin bodo apawoneket baciin o?”

<sup>8</sup> Karabɔŋ bar ɔl ogene azi ne, “Kutuguz kaal ci ger labak ka bar keyelizyai bonati o Joowo giye o ooŋneket niini ageet kaal cigaac ger kagɔɔn o.” Akanan gɔɔn ɔl ogene aneet vɔlɔŋa anɔ ne, Kaduwa gi nico naana Pɔl. Maje naana ŋaan kuduwa gi nico been neen. Apayek zin waanma Jooi nɔɔɔ gi ci agano ki nɔɔgɔ.

#### Akom eet ci abon ŋume o Joowo

<sup>9</sup> Zin naaga ɔl o Juz alaŋ kabona Joowa kujukit ɔl o alaŋ een Juz. Uyene rak keneyuŋ ne, “Naaga ɔl o Juz kibeen moden kaavtiz naaga dook oŋeca.” <sup>10</sup> Eeci ayeedi waragewe o Joowo zɔɔz ci azi ne, “Akom eet ci abona ŋume o Joowo kina ako zee ma akom bac nuun codoi tɔr ele. <sup>11</sup> Akom eet ci aga keŋti ci kaal ween didi. Ma akom eet ci arɔɔŋ kono gɔl o Joowo. <sup>12</sup> Bar ɔl dook otoborit gɔl o Joowo. Ma iziti niigi dook kaal ci labak. Akom ŋaatineeŋ eet codoi tɔr nɔkɔ ci agɔɔn gi ci abon. <sup>13</sup> Alaba niigi ɔl zɔɔza, ma avɔyi zoozowa cigeec noko ɔl daayiza. Ma ɔl ci azii zoozok cigeecik noko adaai. Anyaa zoozowa cigeecik noko daayiz kiyo gɔɔn aŋedet eet kowat o. <sup>14</sup> Abiz nɔɔgɔ toriin been zoozok ci ger utugeti ugeec tɔc. <sup>15</sup> Ma areez niigi ŋaati aruyi ɔl oogi kadaayitɔ. <sup>16</sup> Olla ŋinti avɔyi niigi o uual, ma anyaak ɔl piryakzet ɔɔɔt. <sup>17</sup> Ma alaŋ niigi aganeek baayiz ci abaai yaak been neen. <sup>18</sup> Ma alaŋ buk aŋole Jook been neen.”

<sup>19</sup> Kaga zin naaga dook lotinowa akati ɔl o anyek Jooi nɔɔgɔ ka kuzuuti lotinok nicoko. Ka kɔkɔma bodo ŋaatineeŋ eet ci azi ne, “Alaŋ lotinowa nici akanan aneet.” Ma lotinowe nicoko apak katin Jooi ɔl ci abaak loota noko dook. <sup>20</sup> Akom laadun eet ci anim kozootti lotinok o Joowo dook. Zin giye nico akom eet ci abon ŋume o Joowo gole ci azooni niini lotinok. Bar olla lotinowa ayeleket ageet baciinok ogaac.

### Anyek Jooi eet kobona tuwenta

<sup>21</sup> Bar zin inoko eyeliza Jooi gól ceen didi ci ka kanyeke niini ol kobonta njeume onin. Ma gól nici alaŋ een gól ci kazooni lotinok. Ma lotinowa baal anyek Jooi Mosis e, been zoozok baal aduwa nyakaŋaneta e olla oovek niigi ol gól ci ka kobontai naaga inoko o. <sup>22</sup> Zin gól ci anyeke Jooi ol kobonta njeume onin o aku tuwenta ŋaaten Yesu Kiristo. Agoonek niini gi nico ol o atu nɔɔnɔ dook. Akom nɔɔnɔ tel ci aŋeri ol o Juz ki ol o alaŋ eegin Juz. <sup>23</sup> Eeci ol dook anyak baciinok, ma eɗeyai niigi dook titinyonte o Joowo. <sup>24</sup> Bar zin Jooi irkente onin anyek niini ol kobonta njeume onin labak nɔkɔ ŋaaten Yesu Kiristo o ɔɔga nɔɔɔ oŋeca. <sup>25</sup> Ayelza Jooi Yesu Kiristo ka kizi niini biyete ogin gól cin ka kaarai baciinok ole o atu nɔɔnɔ dook. Agɔɔn Jooi gi nico o ka keyeliza bonat onin. Baale maŋaan Yesu kiiya e alal Jook ziniz, ma alaŋ apak ol oŋene ugeec agɔɔn. <sup>26</sup> Bar zin inoko alaŋaan bodo agɔɔn nɔkɔ, eeci anyewun niini ol gól ci ka kaaryai oŋe ugeec abaca, ma eyeliza bonat onin giye ci anyeke niini ol o atu Yesu kobonta o. <sup>27</sup> Anyet zin inoko Jooi ageet gól ci aaryane oŋe ogaac irkente onin doon. Kanyak zin inoko naaga gi ci ka kɔbɔlɔti tɔ? Akom kina! Eeci alaŋ Jooi agoonet ageet kobonta giye ci kazooni lotinok, bar anyet kobonta giye o katuwi naaga Yesu Kiristo. <sup>28</sup> Kagaac zin inoko naaga anyek Jooi eet kobona njeume onin ŋaati atuwi Yesu doon, alaŋ een ŋaati kazooni lotinok. <sup>29</sup> Ma dim inoko ŋaatunooŋ kizik areez Jooi ol o Juz doon? Akom kina! Alaŋ een neen. Areez buk niini moden dook. <sup>30</sup> Eeci adoi laadun Jooi tɔr nɔkɔ. Anyek niini ol o Juz kobonta ŋaati atuwi Yesu. Ma buk anyek ol o alaŋ eegin Juz kobonta ŋaati atuwi Yesu. <sup>31</sup> Mayo zin inoko abon kapez lotinok o Joowo kizi kaal ci labak, eeci anyet Jooi ageet kobonta tuwenta doon? Akom! Alaŋ een neen. Buk lotinowa ŋaan abon.

### Abona Ibrayim njeume o Joowo tuwenta

**4** <sup>1</sup> Kabaabanit di zɔɔz o Ibrayim ween jijitina ageet ol o Juz dook. Ma da baale niini abona njeume o Joowo naa? <sup>2</sup> Mā da baale Ibrayim kobona njeume o Joowo kaale baal agɔɔn e, abɔlɔl waan. Bar zin ŋaan niini kɔbɔlɔl njeume o Joowo been neen. <sup>3</sup> Ayeedi waragewe o Joowo gi ci azi ne, “Atu Ibrayim Jook, ma anyek Jooi nɔɔnɔ kobona, eeci atu niini nɔɔnɔ.” <sup>4</sup> Gɔɔn mā aliŋliŋ eeti, aruwek ol nɔɔnɔ guruc ci liŋliŋonto. Ma guruca ci agam niini noko alaŋ een guruc ci iirkek ol nɔɔnɔ labak, bar guruc ci liŋliŋon onin. <sup>5</sup> Zin gól o Joowo alaŋ abil nɔkɔ. Ma eeti ci arek ziniz Jook, ma aga ŋaan aara Jooi ŋaatin baciinok ogin giye o atuwi niini nɔɔnɔ, ma alaŋ bar atu niini liŋliŋon onin aliŋliŋoneke Jook, anyek Jooi nɔɔnɔ kizi eet ci abon njeume onin. <sup>6</sup> Ma gi nici atobɔ kibeen gi baal aduwa Devid akati ol baal atalne giye o anyeke Jooi nɔɔɔ kobonta njeume onin tuwente uneeŋ, ma alaŋ een kaale ci abon agɔɔn niigi e. Baale azi Devid giye nico ne, <sup>7</sup> “Ma ol o abaca oŋe, ma aara Jooi nɔɔɔ oŋe ugeec, atalne niigi ɔɔɔt, eeci ubuŋ Jooi oŋe ugeec. <sup>8</sup> Ma atalne buk niigi, eeci alaŋaan aada Manyi oŋe ugeecik abaca been neen.” <sup>9</sup> Mayo inoko talniin ci baal aduwa Devid noko akati ol o ateedi een Juz doon? Akom kina! Ajowa buk ol ween moden alaŋ ateedi talniin nico labak. Kuduktayun rak uyene zoozok o ayeedi waragewe o Joowo azi ne, “Atu Ibrayim Jook, ma anyek Jooi nɔɔnɔ kobona o, eeci atu niini nɔɔnɔ.” <sup>10</sup> Waanice anyek Jooi Ibrayim kobona njeume onin e ma da Ibrayim ateedi? Akom kina! Waanice ŋaan Ibrayim keteede. <sup>11</sup> Anyek zin baale Jooi nɔɔnɔ kobona njeume onin iŋaan keteede e, eeci atu niini Jook. Ma vurtateede Ibrayim ka keyelizyai bayen o anyeke Jooi nɔɔnɔ kobona tuwente onin. Zin giye nico izi Ibrayim baati ol o atu Jook dook o anyek Jooi nɔɔɔ kobonta njeume onin tuwente uneeŋ, yo nuun alaŋ niigi ateedi. <sup>12</sup> Ma buk niini een baati ol o Juz ateedi dook, alaŋ een zin teedinta, bar olla mate atu niigi Jook gole ween didi kiyo buk Ibrayim baale iŋaan keteede e.

### Kaal o aterket Jooi dook ajoyai tuwenta

<sup>13</sup> Baale aterkedek Jooi Ibrayim been dɔl ci dɔl cigin gi ci ka kanyeke niini nɔɔɔ looc dook. Alaŋ zin baale aterkedek Jooi Ibrayim gi nico o giye ci azooni niini lotinok, bar aterkedek niini nɔɔnɔ gi nico o, eeci atuwe. Anyek ni Jooi nɔɔnɔ kobona njeume onin. <sup>14</sup> Mā da waan keterkedek Jooi zɔɔz nico ol o azooni lotinok doon, izi koca zin tuwen gi ci labak, ma buk zɔɔz baal aterket niini e izi koca gi ci labak. <sup>15</sup> Eeci mā aga ol lotinok, ma alaŋ azooni jurun, abornek Jooi nɔɔɔ nɔŋ giye calaŋ azooni niigi lotinok o. Mazi da kɔkɔma lotinok, abac zin koca ol naa? <sup>16</sup> Zin baale aterkedek Jooi Ibrayim zɔɔz ci ka kamayuwi dɔl ci dɔl cigin e, eeci Ibrayim waanice atu Jook ɔɔɔt. Agɔɔn Jooi nɔkɔ o ka kamayuk niini dɔl ci dɔl o Ibrayim irkente onin doon, alaŋ een kaale ci abon agɔɔn niigi. Ma giye nico agaac dɔl ci dɔl o Ibrayim dook ŋedet ŋaan anyek Jooi nɔɔɔ gi o aterkedek. Dɔl zin ci dɔl o Ibrayim neen ol o aga lotinok kibeen buk ol o atu Jook gole ci abil kiyo baal Ibrayim e. Keegin zin naaga dook dɔl ci Ibrayim. <sup>17</sup> Azi baale zɔɔz ci ayeedi waragewe o Joowo giye ci akati Ibrayim ne, “Ŋaan kanyin ineet izi baati moden ci meel.” Aterkedek zin Jooi zɔɔz nico Ibrayim niinilya. Ma gi ci aterket Jooi akɔ zɛe agooni nuun, eeci anyak niini dɔyiz ci iŋaani bodo ol o adaayito daayiza. Ma buk anyak niini dɔyiz ci eenyane olla zɔɔza doon kaal ci laadun ŋaan keelit tɔ been neen. <sup>18</sup> Waanice Ibrayim atu niini Jook, ma aga ŋaan anyek Jooi nɔɔnɔ kizi baati moden ci meelik ɔɔɔt ele, ma are niini zɔɔz baal aterkedek Jooi nɔɔnɔ e zinize ci alal. Mayo nuun waanice ole ol ogen kizik bar zɔɔz nici alaŋ tiŋeere didi abil tɔ e, atuwe Ibrayim waanice labak. Tuwen zin onin neen o anyeke Jooi nɔɔnɔ kizi baati moden ci meelik. Kiyo baale ayeedi waragewe o Joowo azi ne, “Mele tiŋeere dɔlya ci dɔl cugun ger.” <sup>19</sup> Ma iinyaye niceke izi aŋon ka kizi irkitowa o Ibrayim aritan eet tur. Ma aga niini izi matuwoc ɔɔɔt, ma aga buk niini Sara ween ŋaa onin waanice awɔ koliin. Ma buk izi niini matuwoc ɔɔɔt, ma alaŋ agano ŋaati waan ka kitirai dɔl. Bar zin Ibrayim waanice ŋaan amena atu niini gi baal aterkedek Jooi nɔɔnɔ e ɔɔɔt nɔkɔ. <sup>20</sup> Ŋaan niini kotoŋ tuwen onin Joowa, ma alaŋ baraŋ ziniz been neen giye o aterkedek Jooi nɔɔnɔ. Bar adiŋdiŋan niini Jook, ma abil niini kɔdɔk kak tuwente onin. <sup>21</sup> Ma atu niini ɔɔɔt ele gi o anyayi Jooi dɔyiz ci agɔɔni gi o eterket niini. <sup>22</sup> Tuwen zin o Ibrayim neen o anyeke Jooi nɔɔnɔ kizi eet ci abon njeume onin kiyo ayeedi waragewe o Joowo o. <sup>23</sup> Alaŋ zin bar ayeedonek zɔɔz nici Ibrayim doon. <sup>24</sup> Bar akanet zɔɔz nici ageet ele, eeci kobonta buk naaga njeume o Joowo giye o katuwi nɔɔnɔ baal aŋaani Manyi Yesu daayiza e. <sup>25</sup> Adaai Yesu oŋene ogaac, ma iŋaani Jooi nɔɔnɔ daayiza ka kobonta naaga njeume onin.

### Kizito naaga laŋoten ki Jook ŋaaten Yesu Kiristo

**5** <sup>1</sup> Inoko zin kiziti naaga ol ci kabon njeume o Joowo giye o katuwi Yesu Kiristo, ma kanyayit naaga ganon ki Jook ŋaaten nɔɔnɔ. <sup>2</sup> Ma Yesu Kiristo iiten baal kagaman naaga nɔɔnɔ e zɛe been inoko o anyet niini ageet kagaac deten o aku Joowa. Katalne zin naaga ɔɔɔt ele, eeci kaga tiŋeere kazol naaga kibeen nɔɔnɔ titinyon onin. <sup>3</sup> Ma katalne buk naaga mate goon kagide, eeci kaga gidan ademezet ageet gól ci ka goon kemezti piryakzet zinzeetine ci alal. <sup>4</sup> Mazi kamez piryakzet zinzeetine ci alal, atalne Jooi, ma kaga

naaga nõko tiñeere agooneket niini ageet kaal o aterkedeket dook. <sup>5</sup> Zin naaga katu didi alaŋ niini alabanet ageet kaale nicoko, eeci ayeleket niini reezinet o areezet ageet ɔɔɔt. Ma buk areket niini reezonet zinzeeti ogaac dɔyize o Vɔŋiz onin anyet ageet.

<sup>6</sup> Baale ako mazi okomawet ageet gɔl ci ka kitiriti eleeti ogaac dɔyize cinaɪ doon e, iiya Yesu Kiristo adaak ŋaaten ageet o oŋenu iitene o aŋerak Jooi nõɔɔ. <sup>7</sup> Ma gi nici adɔi kak ɔɔɔt eete ci deer ŋaati adaaŋni gone oman ci abon. Karabɔŋ koca gɔɔn tɛ ɛeti oman agama daayiz ci ɛelane eet ci abon kiyo ɛeti nici o labak. <sup>8</sup> Bar zin Jooi eyeleyet reezinet onin areezet ageet ɔɔɔt giye o itoonane Kiristo kiiya kadaak ŋaatinai iiten baal ŋaan kanyayi naaga oŋe ɔɔɔt e. <sup>9</sup> Inoko zin kobonta ŋume o Joowo giye o iiya adaayi Yesu Kiristo ŋaatinai. Ma inoko zin kaga naaga ŋaan aruguzet niini ageet payiinte o Joowo. <sup>10</sup> Baale iŋaan Yesu kiiya kadaak baciinowe ogaac e, keegin naaga mirɔk ci kamarnɔ ki Jook. Mazi iiya adaak ŋeerin Yesu e, abadayet niini ageet kiziti laŋoten ki nõɔɔ bodo. Ma giye o kizitɔi naaga laŋoten ki Jook kaga aruguzet tiñeere Yesu ageet, eeci itihya niini daayiza, ma inoko o arogi. <sup>11</sup> Alaŋ een zin bar gi dook neen nici. Bar buk kanyek naaga Jook zany ŋaaten Manyi ona Yesu Kiristo, eeci abadayet niini ageet kizitɔ laŋoten ki Jook.

#### Zɔɔz ci akati Adam been Kiristo

<sup>12</sup> Baale laadun anyaa oŋec looc ɛeti codoi tɔr nõko. Ma oŋeci nica anyaa daayiz. Makacin atawoza daayizi ɔl dook, eeci abaca ɔl dook oŋe. <sup>13</sup> Baale maŋaan kitoonak Jooi Mosis lotinok ogin e, abaca ɔl oŋe nõko. Zin giye baal ŋaan akomni lotinok, akom eet ci ka kenek gɔn ne, “Abaca niina oŋe.” <sup>14</sup> Mazin iinyaye ci baal Adam neke zɛɛ been iinya baal Mosis e, anyak daayizi dɔyiz ole o deer dook. Yo nuun alaŋ abaca ɔl oŋec gole ci atobɔ ki gɔl baal Adam baal alaŋ azooni niini zɔɔz baal aricanek Jooi nõɔɔ e, adaai waanice ɔl dook nõko.

Zin Adam kibeen Kiristo baal iiya abaak loota vurtu e atobɔ golowe ogen. <sup>15</sup> Bodo buk Adam ki Kiristo aŋɔɔwɔ golowe ogen, eeci oŋeci baal abaca Adam e alaŋ atobɔ kibeen deten o anyet Yesu Kiristo ageet nõko kɔkɔm gi ci kanyek naaga nõɔɔ. Ma gole o oŋec o adoi tɔr baal abaca Adam e, adaayitɔ ɔl ci meelik ger. Bar zin deteni o Joowo been irken o Yesu Kiristo anyak dɔyiz ci appe ɔɔɔt kujuk oŋec o Adam. Eeci ŋaaten Yesu Kiristo amayuk Jooi ɔl dook, ma anyek nõɔɔɔ bonat labak nõko kɔkɔm gi ci aruweg niigi nõɔɔ. <sup>16</sup> Ma deteni o anyaa Jooi bonate onin aŋɔɔwɔ ki gerzitin o anyaa oŋeci o Adam, eeci anyaa oŋeci nica payiin o apayeket Jooi ageet daayiz. Maje deteni o anyaa Jooi irkente onin ŋaati Yesu Kiristo, yo nuun abaca ɔl oŋe ci meel, anyek niini ɔl kobonta ŋume o Joowo. <sup>17</sup> Ma oŋeci baal abaca Adam niini doon kɔdɔwe tɔr nõko e anyaa daayiz moden dook. Mazin buk gi baal iiya utugu Kiristo niini doon kɔdɔwe tɔr nõko e titiny ɔɔɔt ɛle. Eeci giye nice ɔl dook o agama deten o Joowo adikir, ma obonta niigi ŋume onin, ajowa waanma niigi roget o abil been neen ŋaati Yesu Kiristo. <sup>18</sup> Baale apayewun Jooi ɔl dook daayiz oŋece baal agɔɔɔn Adam adoi tɔr nõko e. Mazin buk gole ci atobɔ ki nico ɔɔɔa Jooi ɔl dook oŋeca, ma anyek nõɔɔɔ dook bonat giye o abon adoi tɔr nõko agɔɔɔn Yesu Kiristo, ma anyek niini nõɔɔɔ roget onin. <sup>19</sup> Zin kiyo baale akunak ɔl dook bonati eete codoi tɔr nõko giye o azooni niini zɔɔz o Joowo. <sup>20</sup> Baale anyek Jooi Mosis lotinok ka keyelek ɔl gi o baciinowa ugeecik izitɔi meeɛle. Mazi giye o meelini baciinowa ugeecik ɔɔɔt, eyelizyai bonati o Joowo bar kizi appe ɔɔɔt kujuk baciinok ugeec. <sup>21</sup> Zin kiyo baale oŋeci anyak dɔyiz ci anyaaki ɔl daayiz e, buk bonati o Joowo anyak dɔyiz ci anyeke ɔl kobonta ŋume onin, ma ajowa ɔl roget o abil been neen ŋaaten Manyi onai Yesu Kiristo.

#### Roget ŋaaten Kiristo

<sup>6</sup> <sup>1</sup> Mayo zin inoko abon ŋaati kane ne, “Kameda kutuguz oŋe labak ka bonati o Joowo kizi appe ɔɔɔt?” <sup>2</sup> Akom, eeci kɔɔɔgai naaga dɔyize o oŋecu, keelit naaga oŋeca kiyo ɔl o adaayitɔ o. Alaŋ zin bodo abon ŋaati kamenan kabacan oŋe. <sup>3</sup> Kaga naaga ɔl o oonyi ka koromtozek Yesu Kiristo dook oromtozek buk niigi nõɔɔɔ daayize onin. <sup>4</sup> Mazin iiten baal koonyene naaga e abil kiyo koromtozek naaga dook Yesu Kiristo, ma kadaayitɔ kibeen nõɔɔɔ, ma kadaye kibeen nõɔɔɔ o. Ma gi nici agooni ka naaga rogete onai colai kabaayit baayiz ci colai. Ka zin kiyo buk baale iŋaani Jooi Yesu daayiza dɔyize onin e, ka buk naaga kanyayit roget o colai ŋaaten Yesu Kiristo.

<sup>5</sup> Koromtozek naaga nõɔɔɔ daayize onin, ka katin buk kitingaz naaga daayiza kibeen nõɔɔɔ. <sup>6</sup> Inoko zin kagaac naaga zinzeeti ogaac gerze baal kanyak e, oŋortei iitene baal adaaŋni Kiristo keete ween talakec e. Ka oŋe baal ɛel zinzeetine e kidicai lai. Alaŋaan zin bodo acaboneket ageet oŋe. <sup>7</sup> Eeci ma adaak ɛeti ci deer didi, ɔɔɔgai niini dɔyize o oŋecu. <sup>8</sup> Ma giye o ɔɔɔgayet Kiristo ageet oŋene ogaac reen, keel naaga kiyo kadaayitɔ kibeen nõɔɔɔ o. Ma katu didi karome tiñeere naaga kibeen nõɔɔɔ rogete onin. <sup>9</sup> Eeci kaga naaga itihawi Jooi nõɔɔɔ daayiza. Ma alaŋ bodo niini adaayi been neen, eeci alaŋaan daayizi anim nõɔɔɔ. <sup>10</sup> Adaak baale niini lak codoi tɔr ka keeya dɔyiz o oŋecu. Alaŋaan zin bodo niini adaai been neen. Ma inoko o arogi ka kanyek Jook talniin. <sup>11</sup> Abon zin buk anyeku niiga eleeti keelit kiyo ɔl o adaayitɔ, ma ɔkɔma oŋec dɔyiz ŋaatineeŋ o. Anycek buk eleeti keelit kiyo iŋaanu daayiza, ma arugnu ka anyaahtak Jook talniin ŋaaten Yesu Kiristo o. <sup>12</sup> Maŋaan bodo anyeku oŋec kabal eleeti cugooc o ka calaŋ ayootuŋ igeet utuguz kaal o ger arɔɔŋ eleeti ugooc. <sup>13</sup> Má anyeku eleeti cugoocok o dook kabaca oŋe been neen. Bar anycek eleeti cugoocok o dook Jook ka kanyuŋ niini igeet utuguz kaal ci abon eleetine cugoocok o tup nõko, eeci eelnu niiga kiyo adaaktu, ma itihayuŋ Jooi igeet daayiza orogit bodo o. <sup>14</sup> Alaŋaan zin bodo oŋe anyak dɔyiz ŋaatonooŋ, eeci alaŋaan eeginu niiga gabara ci ka uzuuti lotinok o reen, bar ɔɔɔgawuŋ Jooi igeet bonate onin abaayit yaak.

#### Abon kagɔɔn kaal ci abon tup

<sup>15</sup> Karabɔŋ bar ɛeti oman azi ne, “Kabaca oŋe labak, eeci kaavtiyo naaga bonate o Joowo, alaŋaan kabaak lotinowe.” Bar zin naana kane, Akom! Alaŋ een neen! <sup>16</sup> Agayu niiga mā anyeku eleeti eet oma ka iziti gabara cigin ka iziiyit niiga zɔɔz cin, izitu niiga gabara cigin, ma aziŋnu zɔɔz cin doon. Zin mā buk izitu gabara ci oŋecu, alaŋ bodo animnyu iziti gabara ci Joowo ma ɔl ween gabara o Loryento ano niigi gɔl o daayizo. Maje ɔl ween gabara o Joowo azii niigi Jook, ma agama Jooi nõɔɔɔ kobonta ŋume onin. <sup>17</sup> Inoko zin naana kanaati Jook ɔɔɔt, eeci baale niiga eeginu gabara ci oŋenu, ma bar inoko o uzuutu zinzeetine ugooc demziin o Joowo een didi baal aziŋnu e juruŋ. <sup>18</sup> ɔɔɔgawuŋ zin Jooi igeet oŋeca, ma izitu gabara cigin ka utuguz kaal ci abon. <sup>19</sup> Kazooz zɔɔz ci akati gabara kibeen alaŋat o ka kitirituŋ igeet iziiyit zɔɔz nico juruŋ, eeci zɔɔzowa nici eete ci deer adoi kak. Baale gɔɔn anyeku eleeti ugoocok dook Loryen, ma agoonu oŋe kibeen kaal ci ger tup nõko. Inoko zin buk gole ci atobɔ ki nice anycek eleeti ugooc dook Jook ka utuguz kaal ci abon ɔɔɔt ka zin didi iziti niiga ɔl ci Joowo.

<sup>20</sup> Baale mañaan eeginu gabara ci ñeju e, ñaan waanice iziti gabara ci Joowo. <sup>21</sup> Ma kaale ci ger baal agoonu neke, akom gi ci abon ajowanu kina, bar anyaakuñ inoko kaala nica igeet alyaan zinzeetine ugooc. Zin kaala ci gerze neke anyak daayiz. <sup>22</sup> Bar zin inoko ñagawuñ Jooi igeet ñene, ma izitu niiga gabara cigin. Zin gole nico otoonya Jooi ñe ugooc, ma izitu ñl cigin didi, ma anyuñ niini igeet roget o abil been neen. <sup>23</sup> Mā abaca eeti ñe, ajowa niini daayiz. Maje bar deten o anyek Jooi ñl ogin kōkom gi ci aruwek niigi, ñōñō neen rogeti o abil been neen ñaaten Manyi ona Yesu Kiristo.

#### Ɔogjai ñl o atuwe ñyize o lotinowu

**7** <sup>1</sup> Gōtōngā o tuwento, agayu ri niiga lotinowa anyak ñyiz eete ci deer ñaan arogi eeti o doon. <sup>2</sup> Abil zōz nīci kiyo gōñ azi keerita ogaac ñe, Mā arik dole, abon arome ki eet cino doon ñnti ñaan arogi eeti cine o dook. Bar mazi adaak eeti cine o, ñogjai niini keere baal acabek ñōñō eet onin doon e. <sup>3</sup> Mazi aleeṃnō niini ki eet oma ñaati ñaan arogi eeti cine o, odoma niini zocmaz. Mazi adaak eeti onine, ñogjai niini keere nico ñōñō labak. Zin keere o Juz mā ariyi bodo eeti oman ñaa nico, alaṅ ñaa nīci adoma zocmaz.

<sup>4</sup> Gōtōngā o tuwento, abil buk zōz nīci ñaatunooñ ñōñō. Alaṅ lotinowa bodo anyak ñaatunooñ ñyiz ci ka kabalun igeet, eeci baale iiten baal adaañni Yesu e, abil kiyo buk adaaktu niiga ki ñōñō o. Inoko zin niiga ñogjanu lotinowe, ma oromtewu ki Kiristo baal añaani Jooi ñōñō daayiza e. Abon zin kaliñliṅonek naaga Jook gole ci atalna niini. <sup>5</sup> Baale gōñ mañaan kutuweec Jook e, kagōñ naaga ootine ogaac doon kaal o aroñeket zinzeeti ogaac ageet kutuguz. Maje lotinowa o azi ñe, “Mā agoonu kaal nicoko,” bar anyet ageet kutuguz kaal ci ger ñōñō. Mazin kaal ci baal kagōñ neke anyaket ageet daayiz. <sup>6</sup> Bar zin inoko kōogjai naaga lotinowe nicoko kōñōñō labak, eeci keelit naaga kiyo kadaayitō been Kiristo o. Inoko zin alaṅaan bodo naaga kaliñliṅonek Jook gole ci kazooni lotinok o Mosis, bar kilinliṅtozek naaga ñōñō gole o colai ñaati kozooni gi o ayeleket ageet Vōñizi onine.

#### Ayeleket lotinowa ñeci gitaz

<sup>7</sup> Yo zin inoko kiziti ñe? Kiziti ñe, “Aduye lotinowa been ñe ñōñō?” Alaṅ een neen! Eeci een lotinok neen o anyan aneet ele kaga ñeci gitaz. Mā da waan calaṅ azi lotinowa ñe, “Mā aṅuwe ziniz kaal ci eet oma,” ñaan waan naana kaga ma arōñ ziniz kaal culu o. <sup>8</sup> Bar zin lotinte nico ojowa Loryen gōl ci anyan aneet kuñuweke ziniz kaal culu ñōñō. Mazi da kōkōma lotinok, alaṅ waan anyak ñeci ñyiz ñaatan. <sup>9</sup> Baale laadun alaṅ kaga lotinok, ma waanice kabaaban naana bar kizik kaave rogeta. Bar akō mazi kaga kaal o arican lotinowa o Joowo calaṅ kagōñ, anyawun ñeci ñyiz ñaatan. <sup>10</sup> Ma zin inoko kagawa kabil da baale kiyo eeti o adaak o. Zin lotinowa baal ka waan kanyaaktayan aneet roget e, anyaaktayan bar daayiz. <sup>11</sup> Giye o lotinet nice ojowa Loryen gōl ci alabanan aneet, ma anyan kabaca ñec. Makacin anyan ñeci nīci aneet daayiz. <sup>12</sup> Ayeleket zin zōz nīci gi o didi avuni lotinowa Joowa, ma buk kaal o arecaneket Jooi ageet lotinowe ogin dook kaal ci avu ñaatin, ma een kaal ci eel tōp.

<sup>13</sup> Karabōñ inoko azi eeti oman ñe, “Mazi da lotinowa ma didi abon, anyak zin bodo ñl daayiz ku?” Bar zin mā ajin niini gi nico, alaṅ abon, eeci lotinowa alaṅ anyaa daayiz, bar ñec neen o anyaa daayiz. Anyaket ñeci ageet daayiz giye o ayeḷzan niigi bonat ki gerzitin. Zin lotinowa o Joowo ayeleket ageet olla gi ci gerze agooni o ñec neen. Ma ayeleket buk gōl o gerzini ñeci ñōñō.

#### Anyak eeti ci deer zinzeeti ram

<sup>14</sup> Kaga naaga lotinowa avu Joowa. Bar zin naana eeti ci deer o akōmnan ñyiz, ma anyan Loryen kibil kiyo miroiti o agamanan niini o. <sup>15</sup> Alaṅ kaga kaalyan ci kagoon o been neen. Kazi ñōñō o, eeci gōñ kaala ci kagoon o alaṅ een kaal ona laadun abon karoñ kutugu e neen, bar bodo gōñ kagoon kaal o ger ona laadun alaṅ karoñ kutugu e ele. <sup>16</sup> Zin kagawa didi lotinowa o Joowo abon ñōñō, eeci kaala ci gerze gōñ kagoon o alaṅ een kaal o abon gōñ arōñ ziniz kutugu e neen. <sup>17</sup> Zin giye nico alaṅ een didi aneet neen ci kagoon kaal ci ger noko, bar Loryen o aavi zinize onan neen ci anyan kabaca ñe o. <sup>18</sup> Kaga zin naana alaṅ kanim kutugu kaal ci abon, giye o keene eet ci deer ñenu. Karoñ kutugu kaal ci abon, bar akōmnan ñyiz ci ka kutuguwi kaal ci abon kina. <sup>19</sup> Alaṅ kanim kutugu kaal o abon ona laadun karoñ kutugu e, bar gōñ kagoon kaal oogi doon ci ger ci ñaan laadun kōñōñō kutugu. <sup>20</sup> Mazin gi ci gōñ kagōñe naana kaal ci ger ñaan kōñōñō kutugu o, ayeḷza gi o didi alaṅ kabacane ñec naana maany, bar Loryen o aavi zinize onan neen ci anyan aneet kutugu kaal nicoko o.

<sup>21</sup> Ma gi nico kacin gōñ naana alye can o tūp. Eeci gōñ ñedet karoñ kutugu kaal ci abon, bar alaṅ kanim kutugu been neen, eeci ziniz cane o arōñ kaal ci ger doon ñōñō. <sup>22</sup> Ñedet gōñ kaga oowe can o ñōñō lotinowa o Joowo abon. <sup>23</sup> Bar ñaato anyak bodo zinize onan zozok oogi ci ger aṅrōwō kibeen zozok o Joowo abon. Nicini zin Loryen o aavi zinize onan neen. Arōñ niini kacabeyan aneet ñec ka kizi miroi cin. <sup>24</sup> Izi zin ñōñā cigane wole. Kayo keelawan ñene zinize ci ger akoyan daayiza noko?

<sup>25</sup> Katal Jook ñaaten Manyi onai Yesu Kiristo o iya eelawan aneet.

Olla gōñ naana kabaaban lotinok o Joowo ñōñō doon, maje ziniz cane o abaaban kaal ci akati ñec.

#### Anyet Jooi roget ci colai Vōñize onin

**8** <sup>1</sup> Alaṅaan zin bodo Jooi ñl o oromte ki Yesu Kiristo apayek gerzitin. <sup>2</sup> Eeci abalun ñōñō Vōñizi o Joowo doon o anyak ñōñō roget ñaaten Yesu Kiristo, ma ñōñō ñōñō ñeca been daayiza. <sup>3</sup> Ma lotinowa baal anyek Jooi Mosis e alaṅ aruguzet, eeci naaga ñl ci deer o alaṅ kanim kuzuuti ñōñō. Bar zin Jooi utuguweyet ageet gi ci ñaan lotinowa kutuguzeyet. Itoonak niini ñeerin looc alye ci abil kiyo ele ci eet ci deer anyak ñec o. Itoona Jooi ñōñō o ka kiiya kizi todoyoi ci aara ñyiz o ñenu ñla dook. <sup>4</sup> Agōñ Jooi gi nico o ka kutuguz naaga kaal o abon aduwa lotinowa dook, giye o naaga o kotoñit kaal o ger baal gōñ arōñ zinzeeti kutuguz e, inoko kabaayit ñyize o Vōñiz o Joowo. <sup>5</sup> Ma ñl o gōñ awoyi ñyiz o eleeti ugeec doon, abaaban niigi tūp ñōñō kaal o ger arōñ zinzeeti ugeec doon. Maje ñl o awoyi ñyiz o Vōñiz o Joowo doon, abaaban niigi kaal o aroñek ñōñō Vōñizi o Joowo. <sup>6</sup> Ma eeti ci agōñ kaal o ger arōñ ziniz onine doon, akō niini daayiza. Maje bar eeti ci abaaban kaal o aroñek ñōñō Vōñizi o Joowo doon, anyek Jooi ñōñō roget been ganōñ. <sup>7</sup> Ma eeti ci abaaban kaal o ger arōñ ele onine doon, amarno niini ki Jook giye o alaṅ aziñni niini lotinok o Joowo, ma alaṅ anim niini kozootti ñōñō. <sup>8</sup> Didile kaduwakuñ igeet, ma ñl o agōñ kaal o ger arōñ zinzeeti ugeec doon, alaṅ atalne Jooi ñaatineñ.

<sup>9</sup> Bar zin mā didi aavi Vōñizi o Joowo zinzeetine ugooc, alaṅ koca bodo niiga anyu kaal o arōñ zinzeeti ugooc doon, bar anyu koca kaal o aduwakuñ igeet Vōñizi o Joowo. Mā eeti calaṅ anyak Vōñizi o Joowo zinize onin, alaṅ niini een eet ci Kiristo. <sup>10</sup> Bar zin mā abaak Kiristo zinzeetine ugooc, adaai tiñeere eleeti doon giye ci ñeju. Maje vōñizowa cugooc o arogi, eeci anyuñ Kiristo

igeet obonta Joowa. <sup>11</sup> Mā abaak Vəŋjizi o Joowo baal adəŋa Yesu daayiza e zinzeetine ugooc, ŋaan zin buk anyek Jooi eleeti cugoooc o waan ci adaanŋu roget ŋaaten dɔyiz o Vəŋjiz onin abil ŋaatunooŋ.

<sup>12</sup> Gətəŋɔga o tuwento, alaŋ abon ŋaati kagəŋni naaga kaal o ger arəwŋ zinzeeti ogaac doon, bar abon kagəŋ gi o aduwaket ageet Vəŋjizi o Joowo. <sup>13</sup> Mā agoonu kaal o ger arəwŋ zinzeeti ugooc doon, avoyu koca daayiza. Bar zin mā adayeyu niiga kaal o ger baal gəŋn agoonu e dook look dɔyize o Vəŋjiz o Joowo, urugtu koca.

<sup>14</sup> Ma ɔl o arayin nɔwɔg Vəŋjizi o Joowo dook iziti niigi dɔl ci Joowo. <sup>15</sup> Eeci Vəŋjizi o anyuŋ Jooi igeet, alaŋ anyuŋ ka iziti gabara bodo, ma alaŋ buk anyuŋ ɔtəŋɔlte looc. Bar anyuŋ niini igeet iziti dɔl ci Joowo, ma anyet kotoweec Jook kizi baatinai. <sup>16</sup> Ma Vəŋjizi o Joowo kibeən vəŋjizok ogaac aduwaket gi o kizitɔi naaga dɔl o Joowo. <sup>17</sup> Zin giye o kizitɔi naaga dɔl ci Joowo, kajowa tiŋeere naaga kaal o abon itaŋeket niini ageet ɔl ogin. Ma buk giye o koromtozeke naaga Yesu Kiristo, kajowa tiŋeere naaga kaal o abon itaŋek Jooi nɔwɔ. Eeci mā kapirna naaga been Yesu, anyet buk koca tiŋeere Jooi ageet kozolit ki nɔwɔ titinyon onin.

#### Kajowa katin titinyon naaga dook ki Yesu

<sup>18</sup> Kaga naaga mā kayabiz titinyon o appe ka kanyet Jooi ageet katin kibeən piryakzet ci kapirname inoko noko, piryakzet nici gi ci labak. <sup>19</sup> Ma kaal o ɛenyca Jooi dook inoko areyi talniinta, ma arəwŋ niigi iiten ci katin ayelzan Jooi dɔl ogin e kiiya kataman.

<sup>20</sup> Areyi niigi o, eeci iziti niigi dook kaal ci labak. Alaŋ een zin nɔwɔ maany neen ci anyek eleeti kizi kaal ci labak o, bar Jook neen o anyewun nɔwɔ kizi kaal ci labak. <sup>21</sup> Bar zin ŋaan anyak iiten ci arek Jooi ka tiŋeere kɔwɔjai kaal ogine baal ɛenyca niini e dook kaale ci ger anyek nɔwɔ kiziti gerzete noko. Ka zin kɔwɔzɔ niigi labak calaŋ aavtiz cabiinte o kaal o ger, ka buk kanyayit niigi titinyon kiyo dɔlya ci Joowo o.

<sup>22</sup> Kaga naaga kaal o ɛenyca Jooi dook ŋaan apirna, ma ŋaan niigi alu nɔkɔ zɛɛ been inoko o kiyo ŋaa o gəŋn aam dole ka kotoyai o. <sup>23</sup> Bar zin alaŋ een kaal ci ɛenyca Jooi oogi doon ci apirna, ma alu o. Akom! Bar buk naagalya o anyet Jooi Vəŋjiz onin ka keyeleyet kaal o abon ka kanyet niini ageet katin, ŋaan buk kapirna ki luwa nɔkɔ. ŋaan zin kare naaga iiten o katin atalnanet Jooi ageet kiziti dɔl cigin baliinte onin, ma anyet niini ageet eleeti ci colai e. <sup>24</sup> Orogozet zin Jooi ageet giye o karewi naaga tuwenta kaal o abon ka kanyet tiŋeere niini ageet. Inoko tɛ kojokta kaal ci ŋaan kare noko, alaŋ waan bodo kareyi. Eeci gəŋn laadun mā ojowa ɛeti gi ci da gəŋn are, alaŋ bodo areyi. <sup>25</sup> Inoko zin mā kare naaga kaal ci ŋaan kicin it neke, abon kare zinzeetine ci alal zɛɛ ma alam tiŋeere kajowa.

<sup>26</sup> Ma buk Vəŋjizi o Joowo atiritet ageet, eeci keegin naaga ronŋenen tuwenta. Ma alaŋ kaga gɔl ci abon ka kijinti Jook. Zin giye nico Vəŋjizi o Joowo ilalek Jook ŋaaten ageet gole ci aŋrəwɔ kibeən cinai ageet ɔl ci deer o. <sup>27</sup> Aga zin Jooi kaal o kanyak naaga zinzeetine ogaac dook. Ma buk aga niini baabaninet o Vəŋjiz onin. Ma aŋaryonek Vəŋjizi o Joowo ɔl o atu Jook kaale o atal Jooi.

<sup>28</sup> Kaga naaga aɡəŋn Jooi bonat kaale o akanai ole o arez nɔwɔ dook. Ma nici ɔl o eŋera niini kizi ɔl cigin eo arəwŋ niini. <sup>29</sup> Zin giye o eŋera niini ɔl nicoko kizi ɔl cigin baale kinatamma laadun e, arəwŋ buk niini kanyek nɔwɔ keelit kiyo ŋeerin Yesu o. Aɡəŋn niini gi nico o ka Yesu kizi abuu dolene ci Joowo meelik. <sup>30</sup> Zin ɔl ci baal aŋera Jooi nɔwɔ noko iziti niigi ɔl cigin, ma anyewun niini nɔwɔ kobonta ŋume onin, ma azɔl niini been nɔwɔ titinyon onin.

#### Eyeleyet Jooi ageet reezinet onin arezet ŋaaten Kiristo

<sup>31</sup> Inoko zin kaale nicoko dook, mā koromte naaga kibeən Jook didi, ŋeneen zin bodo koca ci ka komoget ageet o? Akom kina! <sup>32</sup> ŋaan Jooi kujurai ŋeerin ŋaati itoonake looc, bar itoona niini nɔwɔ kiiya kadaak ŋaaten ageet. Zin yo mā anyet niini ageet ŋeerin onin ɛle o, bar zin tiŋeere alaŋ anyet niini ageet kaal o aterkedeket dook? <sup>33</sup> ŋeneen zin bodo ci ka kɔkɔlak ɔl o eŋera Jooi rooni o? Akom kina! Eeci Jook ɛle neen o anyet ageet kobonta ŋume onin. <sup>34</sup> ŋeneen zin bodo ci ka kizi ne, Keegin naaga gerze? Akom kina! Eeci Yesu Kiristo adaak ŋaatina, ma itihawi Jooi nɔwɔ daayiza, ma inoko aavi niini aziite o Joowo azo tammu tadena, ma ilalek niini Jook ŋaaten ageet. <sup>35</sup> Gitaz ci ka keŋerawet ageet reezinte o Kiristo? Yo nuun iinaket kaal ci gerze kiyo piryakzet, ki giden, ki magizeeti, ki maatz, been zɔwɔ ci arəwŋ kuruktet ɔl ageet kadaayit, alaŋ aŋeranet ageet reezinte o Kiristo been neen. <sup>36</sup> Abil kiyo ayeedi waragewe o Joowo azi ne, “Aɔŋn gəŋn daayizi ŋaaten ageeta ii tup nɔkɔ, eeci kanuyin naaga ineet. Agoonet gəŋn ɔl ageeta kiyo ɛezana o avoyi ɔl toŋdiin o.” <sup>37</sup> Bar zin naaga kamək kaal ci ger apirnanet ageet noko dook lai ŋaaten dɔyiz o Yesu Kiristo o arezet ageet. <sup>38</sup> Kaga zin naana ɔrɔt ɛle akom gi ci ka keŋerawet ageet reezinte o Kiristo, yo nuun een daayiz, karabəŋ een roget, karabəŋ een toonnyak o tammo, karabəŋ een miniŋ, karabəŋ een dɔyiz oma ci abil tammu tadena, karabəŋ een kaal ci kacin loota noko, karabəŋ een kaal ci ka keyelizai katin, <sup>39</sup> karabəŋ een kaal ci ɛel tammu keŋa, karabəŋ een kaal ci ɛel tɔdɔ loota. Alaŋ kaalyana nicigi dook anim keŋertawet ageet reezinte o Joowo kanyak naaga ŋaaten Manyi ona Yesu Kiristo.

#### Jook kibeən ɔl ogin aŋera niini

<sup>9</sup> <sup>1</sup> Zɔwɔ ceen didi karoŋ kuduwayuŋ ce. Ma naana o koromozeya Kiristo alaŋ kaduwa gi ceen vɔlɔŋ, eeci ayelekan Vəŋjizi o Joowo aneet gi ceen didi. <sup>2</sup> Kakati gəŋn culum ɔrɔt ɛle, ma acirit ziniz ɔrɔt giye ci akati ɔl ogan een Juz karitane. <sup>3</sup> Inoko tɛ kizi gi ci agama ɔl ogane Juz Jook gole ci kanyeke Jook kotoboran aneet, ma eeyan gɔl o Kiristo, kagoon koca nɔkɔ. <sup>4</sup> Baale eŋera nɔwɔ Jooi ka kiziti ɔl cigin, ma eyelek nɔwɔ diŋdiŋon onin. Ma aterkedek nɔwɔ zɔwɔ onin, ma anyek nɔwɔ lotinok ogin, ma ayelek nɔwɔ gɔl ci ka kidiŋdiŋanti niigi nɔwɔ, ma waanice agamta niigi terkediin baal aterkedek Jooi nɔwɔ e. <sup>5</sup> Niigi dɔl ci dɔl o jijitigaac Ibrayim ki Aizak been Jakob. Zin Kiristo alya aritai buk bore nico. Bar zin Kiristo niini Jook o abal kaalyan dook neen. Abon naaga dook kanaat nɔwɔ nɔkɔ been neen. Nɔwɔ neen.

<sup>6</sup> Alaŋ zin bar kazi ne, Ereyek Jook zɔwɔ baal aterkedek niini ɔl o Juz e, eeci alaŋ aterkedek niini zɔwɔ nice nɔwɔ dook. <sup>7</sup> Ma buk dɔlya ci dɔl o Ibrayim dook alaŋ eegin dɔl cigin didi. Bar zin baale anek Jooi Ibrayim ne, “Katin dɔl cugin een didi neen dɔlya ci ŋeerun o kazi Aizak doon.” <sup>8</sup> Ma keŋ ci zɔwɔ nico akati gi calaŋ ɛene dɔlya o Ibrayim arita niini gole ci eet o deer dɔl ci Joowo. Bar zin dɔl ci dɔl o Ibrayim een didi neen dɔlya o ŋeerin o kazi Aizak baal aterkedek Jooi nɔwɔ e. <sup>9</sup> Iitene nice aterkedek Jooi Ibrayim zɔwɔ ci anek ne, “Anyak iima ŋaa cune kazi Sara noko logoz ceen code ŋaati Rebeka ween ŋaa onin. <sup>11-12</sup> Mazi ŋaan codena nicaga kitiryai maŋaan buk kagaac niigi gi ci abon been gi ci ger e, enek Jooi yaatineen ne, “Tiŋeere codena cugune anyei noko aku ceen abuu o een gabaren ci gəŋn ceen tutur o.” Aɡəŋn Jooi gi nico o ka keyeliza gi o aŋeran dole nico niini doon ooowe onin. Alaŋ aŋera Jooi dole nico o, eeci anyak gi ci aɡəŋn, bar aŋera olla baabaninte onin doon labak. <sup>13</sup> Kiyo ayeedi waragewe o Joowo zɔwɔ ci ane Jooi ne, “Kareez coden ween tutur kazi Jakob, ma kabur abuu onin kazi Eso.”

<sup>14</sup> Mayo kiziti ne? Kiziti ne, Anyak Jooi tɛl zooze nico? Akɔm! Alaŋ anyak niini tɛl been neen. <sup>15</sup> Baale anek Jooi Mosis ne, “Awucnekan waanma ɔl o kaŋera naana.” <sup>16</sup> Zin Jooi alaŋ aŋera eet giye ci arɔŋi eeti keŋeryai, karabɔŋ een liŋliŋonte ci abon agɔɔn ɔl. Bar aŋera niini eet giye ci awucneki eeti nici nɔɔnɔ. <sup>17</sup> Ayeedi waragewe o Joowo zɔzɔ ci aneke Jooi alaan baal Masiru kazi Veero ne, “Keŋerawin ineet izi alaan ka keyelizak ɔl dɔyiz onan ŋaaten ineet, ka zin ɔl ci abaak loota noko dook katanaazo zaar ogan.” <sup>18</sup> Awucnek zin Jook eeti ci arɔŋi niini, ma anyek oma kɔdɔk ziniz ka kotobor nɔɔnɔ.

Abor Jooi nɔŋ, ma bodo awucnek ɔl nɔɔnɔ

<sup>19</sup> Karabɔŋ anyak ŋaatunooŋ eet ci ajine azi ne, “Ma da mǎ aŋera Jooi ɔl ci arɔŋi niini, ma anyek ɔl oogi kodoyit zinzeeti, zin bodo ɔl ci agɔɔn kaal ci anyek niini nɔɔŋo kutuguzɔ o azi ne, Anyak oŋec o naa? Ŋeneen ci ka kicikto kibeen nɔɔnɔ giye ci arɔŋi niini?” <sup>20</sup> Ma niina laŋo ci azooz koca nɔkɔ o, een niina ŋeneen ci ka jin Jook zɔzɔ nico o? Alaŋ iju ceen tɔdɔwac ajin ŋaa o eenyca nɔɔnɔ kenek ne, “Ma laadun eenycaan kibil nɔkɔ naa?” <sup>21</sup> Ma ŋaa ci eenyet ijunya eenyet olla eo arɔŋi niini. Ma eenyca ijunya ram tɔdɔwace codoi o ele. Eenyca atuny ci ka kowodɔi eeti doon, ma eenyca bodo iju ci maamu ka kuwudɔi ɔl dook.

<sup>22</sup> Agɔɔn zin buk Jooi gi nico o. Arɔŋi ka keyelizak bornet nɔŋ kibeen dɔyiz onin ɔl o gɔɔn agɔɔn kaal o ger ŋume onin. Bar zin inoko ŋaan alal nɔɔnɔ ziniz ŋaaten nɔɔŋo ci agano ŋaati waan atarganyin noko. <sup>23</sup> Ma buk bodo arɔŋi niini keyeleyet titinyon onin ageet o kuwucek nɔɔnɔ baal eŋerawet niini ageet laadun ka kozolit ki nɔɔnɔ titinyon onin e. <sup>24</sup> Ageet zin neen o eŋerawet Jooi ka kiziti ɔl cigin. Alaŋ aŋera niini ɔl cigin ole o Juz doon, bar buk aŋera niini ɔl cigin ole o alaŋ eegin Juz. <sup>25</sup> Ayeedi waragewe o nyakanan o kazi Ozeya zɔzɔ ci ane Jooi ne, “Kawa tiŋeere moden baal gɔɔn alaŋ een ɔl cigan e, ma kaku kanei nɔɔŋo ne, Inoko niiga izitu ɔl cigan. Ma buk giye baal gɔɔn alaŋ kareeze naana nɔɔŋo e, kaku kanei ne, Inoko kereezuŋ. <sup>26</sup> Awanuŋ zin katin Jooi o arogi kodot igeet, ma aku anekuŋ ne, Izitu ɔl cigan, ŋaabaal gɔɔn baale anekuŋ ɔl ne, Alaŋ eeginu ɔl ci Joowo e ele.”

<sup>27</sup> Ma buk baale uuwak Izaya zɔzɔ ci akati Israyil azi ne, “Mayo nuun meele ɔl o Israyil zee ma atobo ki kazac o liiltogu o, arogze katin ŋaatineeŋ ci miliny ter. <sup>28</sup> Eeci alaŋ bodo Manyi aavi ŋinti reen, bar aku tiŋeere niini kataman ka kiiya kapak looc nico dook.”

<sup>29</sup> Abil buk ŋaatinai kiyo baale azi Izaya ne, “Mǎ da calaŋ ooŋ Jooi dɔl ci dolenu oogi ŋaatinai, kidicai waan naaga dook lai oŋene ogaac kiyo baale uulal Jooi ɔl o kuturyok o kazi Sodom been Gomora oŋene ugeec e.”

Ala Pɔl Jook ka korogoz ɔl o Juz

<sup>30</sup> Mayo inoko zoozowa nicigi akati naa? Akati zoozowa nicigi gi ci modena baal gɔɔn alaŋ arɔŋi katamanit gɔl ci ka kobontai niigi ŋume o Joowo e, inoko o, obonta buk niigi ŋume onin tuwenta. <sup>31</sup> Maje ɔl o Israyil baal laadun aŋera Jooi e arɔŋi baale niigi lotinok ci ka kobontai niigi ŋume o Joowo, bar ŋaan kojokta. <sup>32</sup> Mazin da ŋaan kojokta niigi bonat o naa? Ŋaan kojokta o, eeci waanice ataman niigi gɔl ci ka kobontai ŋume o Joowo dɔyize ci eleeti ugeec kaale ci abon agɔɔn, alaŋ een tuwente ci atuwi niigi Yesu Kiristo. Ma eel niigi enice kiyo eeti o adir be o. <sup>33</sup> Ayeedi waragewe o Joowo zɔzɔ ci azi ne, “Icinit di! Kariya be kutur onan kazi Jerusalem, ka be nici kidir ɔl kuruyit looc. Bar zin ɔl o atu nɔɔnɔ dook alaŋ bodo niigi ajowa celbezitin tuwente uneeŋ.”

**10** <sup>1</sup> Gɔtɔnɔga o tuwento, karoŋi zinize onan dook ɔl ogan Juz korogit. Kajin gɔɔn Jook ka korogoz nɔɔŋo. <sup>2</sup> Kacin ŋedet nɔɔŋo aliŋliŋonok Jook ɔɔɔt, bar zin alaŋ aliŋliŋonok niigi nɔɔnɔ gole ween didi. <sup>3</sup> Ŋaan kagaac niigi gɔl o anyeke Jooi ɔl kobontai ŋume onin, ma bar ataman gɔl ci ka kanyeke eleeti kobontai ŋume o Joowo gole cineeŋ doon. Bar otoborit niigi ŋaati anowi gɔl o Joowo anyeke ɔl kobontai ŋume onin. <sup>4</sup> Eeci akɔ mazi aku Yesu e, otɔŋte kaal baal gɔɔn agɔɔn ɔl lotinowe ka kobontai niigi ŋume o Joowo e, ka zin ɔl o atu Yesu dook kobontai ŋume o Joowo.

Aroŋek Jooi ɔl dook roget

<sup>5</sup> Baale eŋeyet Mosis zɔzɔ ci anyet Jooi kobontai ŋume onin ŋaati kazooni lotinok azi ne, “Mǎ azooni eeti kaal o arican lotinowa o Joowo dook, ajowa niini roget.” <sup>6</sup> Bar zin buk ayeedi waragewe o Joowo zɔzɔ ci abonan eeti ŋume o Joowo tuwenta azi ne, “Mǎ anyeku eet kabaaban ziniza gi ci azi ne, Ŋeneen dim yo ci ka kook tammu tadena?” Anycaŋ zin kuduwayuŋ keŋ ci zɔzɔ nico. Akati zɔzɔ nici gi ci karɔŋi naaga eet ci akɔ tammu tadena ka kook kotowayet Yesu kiiyayet ageet loota ŋina. Bar zin akɔm eet ci ka kook tammu tadena ka kook kotowayet nɔɔnɔ kiiyayet ageet loota ŋina. <sup>7</sup> Bodo buk ayeedi waragewe o Joowo zɔzɔ ci azi ne, “Mǎ anyeku eet kabaaban ziniza gi ci azi ne, Ŋeneen dim ci ka kook tɔdɔ loota miniŋe?” Anycaŋ bodo di kuduwayuŋ keŋ ci zɔzɔ nico. Akati zɔzɔ nici gi ci karɔŋi eet ci ka kook kɔdɔŋa Yesu daayiza. Bar akɔm eet ci ka kook tɔdɔwai tɔ miniŋe ka kook kɔdɔŋayet Yesu daayiza kina. <sup>8</sup> Azi zin warage o Joowo ne, “Aŋɔn zɔzɔ o Joowo nɔkɔ zinzeetine ugooc kibeen utugetine ugooc.” Zin zɔzɔ nici zɔzɔ o gɔɔn kuwaweyuŋ naaga igeet o neen. Azi zɔzɔ nici ne, Abon niiga atuyu Yesu Kiristo. <sup>9</sup> Mǎ aboranu niiga utugetine ugooc maany zɔzɔ ci aniyu ne, “Yesu Manyi ona neen,” ma atuyu zinzeetine ugooc gi o itinawi Jooi nɔɔnɔ daayiza, orogoztewu koca niiga. <sup>10</sup> Eeci mǎ katu naaga Yesu zinzeetine ogaac dook, anyet Jooi kobontai ŋume onin. Bodo buk mǎ kaduwa utugetine ogaac zɔzɔ ci kazi ne, “Yesu Manyi ona neen,” korogozte koca naaga. <sup>11</sup> Ayeedi waragewe o Joowo gi ci azi ne, “ɔl o atu nɔɔnɔ dook alaŋ bodo niigi ajowa celbezitin tuwente uneeŋ.” <sup>12</sup> Ma gi nici akati ɔl dook. Akɔm bodo ŋɔrɔwɔnet ci aŋɔrɔwɔne ɔl o Juz ki ɔl o alaŋ eegin Juz. Eeci Jooi niini Manyi ci ɔl dook, ma amayuk niini ɔl o gɔɔn awo nɔɔnɔ ŋaati arɔŋi tirten. <sup>13</sup> Kiyo azi waragewi o Joowo ne, “Ma eeti ci awo zaar o Joowo giye ci ka kitiriti Jooi nɔɔnɔ, arogoz niini nɔɔnɔ.”

<sup>14</sup> Ka zin yo ɔl kijinit Yesu Kiristo ka kiiya kitirit nɔɔŋo ku, mǎ ŋaan kutuwit niigi nɔɔnɔ? Ka zin yo buk ɔl kutuweec nɔɔnɔ ku, mǎ ŋaan kiziiyit niigi kaviyak ogin? Ka zin yo buk ɔl kiziiyit zɔzɔ o Yesu ku, mǎ ŋaan akɔm eet ci uwayek nɔɔŋo? <sup>15</sup> Ka zin yo buk ɔl kɔɔt kuduktak gɔnɔgi oogi kaviyak o Yesu ku, mǎ ŋaan akɔm eet ci itoon nɔɔŋo? Kiyo azi warage o Joowo ne, “Amadi ɔɔɔt kuni ci ɔl o anyaa kaviyak o Joowo abon.” <sup>16</sup> Bar zin ŋaan kagamta ɔl dook kaviyak o Joowo abon. Azi baale nyakanani o kazi Izaya waragewe o Joowo ne, “Manyi, inoko ŋeneen ci utu kaviyak ugun baal kuwaka e?” <sup>17</sup> Aku zin tuwen ŋaati aŋiŋni ɔl rak ɔwaka kaviyak o Yesu. Alaŋ aga ɔl kaviyak o Kiristo dɔyize cineeŋ doon dooke coma uwayek gɔnɔgia ogen nɔɔŋo.

<sup>18</sup> Inoko zin kajinei, ma da didi ɔl o Israyil ŋaan kiziiyit kaviyak o Joowo abon? Ŋedet niigi iziiyit baale juruŋ kaviyak o Joowo abon. Kiyo ayeedi waragewe o Joowo zɔzɔ ci azi ne, “Urunit kaviyawa o Joowo abon loocok dook. Makacin iziiyit ɔl zɔzɔ onin zee been viten ci akani tammu zɔɔ looc e buk.” <sup>19</sup> Bodo kanyei jinen oma ce. Ma da ɔl o Israyil baale ŋaan kagaac kaviyak nicoko? Didi ɔl o Israyil agaac ŋedet kaviyak o abon. Baale aduwa Jooi ŋaaten Mosis zɔzɔ ci azi ne, “Kanyuŋ tiŋeere igeet amadiyit ɔl o alaŋ eegin Juz, ma kanyuŋ otobortek nɔŋ moden o tarbal ŋaan kedemezo.” <sup>20</sup> Ma buk aduwa bodo Jooi ŋaaten Izaya gi ci abiirni ɔl ooti azi ne, “Ojoktawan ɔl baal laadun ŋaan karɔŋtan niigi aneet e, ma keyelizaya ele onan ɔl o ŋaan laadun kijintan niigi aneet.”

<sup>21</sup> Maje bar ole o Israyil aduwa Jooi ŋaaten Izaya gi ci azi ne, “Kilalei gɔɔn ɔl ogan tup nɔkɔ ka kabadayan bodo niigi aneet, bar zin adoɪ nɔɔgɔ zinzeeti kak, ma alaŋ arɔɔŋ kiziiktan.”

#### Arogze ɔl o Israyil ogen

**11** <sup>1</sup> Anycaŋ zin di kijinuy zɔɔz oma ce. Mayo zoowowe nicoko o tobor Jooi ɔl ogin Israyil? Akɔm kina! Naana Pɔl alya keen eet ci Israyil. Keen dole ci dɔl o Ibrayim. Ma een bor can neen ɔl o kazi Benjimen. <sup>2</sup> Ŋaan zin Jooi kotobor ɔl ogin baal eŋera niini laadun kinatamma e. Agayu niiga zɔɔz o ayeedi waragewe o Joowo akati nyakaŋan o kazi Ilija waan baal aduwake Jook zɔɔz o akati kaal o agɔɔn ɔl o Israyil anek ne, <sup>3</sup> “Manyi, uruyit ɔl nicigi nyakaŋanet ugun dook kadaayito. Ma buk oyoyit niigi viten ugun taabinto lai. Kize zin inoko aneeta doon ci ŋaan katuyin ineet, ma arɔɔŋ niigi gɔl ci ka kuruktan aneet buk.” <sup>4</sup> Anek yo waanice Jooi Ilija zooze nico ne? Anek ne, “Kanyei ɔl ceen eet amɔtɔ lak tur lak torgerem (7000) ole o Israyil calaŋ adiŋɔŋan niigi jook o adilyai kazi Bayil been neen.” <sup>5</sup> Abil zin buk waanico kiyo iiteni nica baale e ele. Anyak Jooi ɔl ci miliny aŋera, eeci awucnek niigi nɔɔnɔ. <sup>6</sup> Aŋera niini nɔɔgɔ giye o awucneke niigi nɔɔnɔ, alaŋ een zooze ci agɔɔni niigi kaal ci abon. Mā da waan keŋera niini nɔɔgɔ kaale ci abon agɔɔn niigi, alaŋ waan kazi ne, Awucnek niigi nɔɔnɔ didi.

<sup>7</sup> Mayo zin inoko zɔɔz nici ayeleket ageet naa? Ayeleket zɔɔz nici gi ci ɔl o Israyil dook ŋaan kojokta rogzen baal arɔɔŋ e. Ma bar ivita ojokta rogzen ɔl baal miliny aŋera Jooi ŋaatineeŋ e doon. Ma anyek bodo Jooi ɔl oogi ŋaatineeŋ kodoyit zinzeeti kak calaŋ azii zɔɔz onin. <sup>8</sup> Kiyo ayeedi waragewe o Joowo zɔɔz ci azi ne, “Anyek Jooi nɔɔgɔ kizi garanye zinzeeti ki ooti, ma alaŋ buk anim niigi kicintɔ karabɔŋ aziŋne zɛe been inoko o.” <sup>9</sup> Buk baale Devid azi ne, “Abon bai ɔl nici ajowa nɔŋ ci ger kaale o abon anyek Jooi nɔɔgɔ dook. Abon bai ookconek kaal ugeec abon nɔɔgɔ ele kidirte kakati ooti looc, ma ajowa piryakzet Joowa. <sup>10</sup> Abon bai atoozyai nɔɔgɔ kebere kiziti rubene. Abon bai ajowa niigi piryakzet ci akani culum tup nɔkɔ.”

<sup>11</sup> Inoko zin kajine kazi ne, Mayo inoko ɔl o Juz ma abacit niigi gɔl o Joowo o, alaŋaan Jooi agama nɔɔgɔ bodo? Akɔm! Giye o abacan niigi oŋe, otowa Jooi ɔl o alaŋ eegin Juz ka kivita kojokta roget. Ma giye nico arɔɔŋ Jooi ka kanyek nɔɔgɔ kicinit ɔl o alaŋ eegin Juz orogozte ka zin koroŋŋit buk niigi rogzen nico. <sup>12</sup> Bar zin oŋe o abaca ɔl o Juz ɔkɔlak ɔl ween moden gɔl ci amayuwi Jooi nɔɔgɔ loocowe dook. Eeci bornete uneeŋ aborni niigi Jook, amayuk Jooi ɔl o alaŋ eegin Juz. Akɔ zin katin zɛe mazi agamta niigi Jook, amayuk Jooi nɔɔgɔ kibeen ɔl dook ɔrɔt.

#### Rogzen o ɔl o alaŋ eegin Juz

<sup>13</sup> Karooŋ di kozoozo been igeet ɔl o alaŋ eeginu Juz. Atoonanan Jooi aneet kizi toonnyai ci Yesu ŋaaten igeet o alaŋ eeginu Juz. Kaga zin naana liŋliŋɔnti ci anyan Jooi aneet noko liŋliŋɔn ci adiŋɔŋ ɔrɔt ele. <sup>14</sup> Karooŋ zin gɔl ci kanyeke ɔl cigan een Juz noko kiziti zinzeeti bek, ka coma avunak ogen ŋaatineeŋ Jook ka kivita korogozte. <sup>15</sup> Akɔ waanice mazi o tobor Jooi ɔl o Israyil e, anyewun niini ɔl o loocok dook kiziti laŋotigin. Mazi yo tiŋeere ma agama Jooi nɔɔgɔ bodo kiziti ɔl cigan abil ku? Abil koca tiŋeere kiyo ɔl o da adaayito, ma bodo iŋaaz daayiza o.

<sup>16</sup> Gɔɔn mā ataabi eeti ɔkoc ŋintimiliny Jook keere o Juz, ɔkoc nici dook izi ci Joowo. Buk ma anyonek agernati ci keetu Jook, keet nici dook izi ci Joowo. <sup>17</sup> Ma laadun ɔl o Juz niigi bor o Joowo ricik neen. Maje ɔl o alaŋ eegin Juz niigi alaŋ eegin bor ci Joowo. Bar zin o tobor Jooi ɔl oogi ole o Juz ŋaati eene ɔl cigin. Ma agama ɔl oogi ole ween moden kiziti ɔl cigin. Zin ŋina niiga ɔl o alaŋ eeginu Juz oromtozeyu ɔl o Juz, ma iya ozoltu niiga dook been nɔɔgɔ roget been baayiz o abon abaai bor o Joowo. <sup>18</sup> Bar zin mā adoŋnyu eleeti, ma apezu ɔl o Juz. Abon agayu niiga mayuwenet o Joowo akunakuŋ igeet ŋaatineeŋ.

<sup>19</sup> Karabɔŋ bar adoŋnyu eleeti aziyu ne, “Ma alaŋaan ɔl o Juz atu Yesu o, kirigizit naaga nɔɔgɔ kiziti bor ci Joowo.” <sup>20</sup> Ŋeɔet zin gi nici abil tɔ. O tobor Jooi nɔɔgɔ o, eeci alaŋ atu niigi Yesu. Bodo Jooi anyuŋ igeet iziti bor cigin o, eeci atuyu niiga Yesu. Alaŋ zin waan agano ŋaati abololu, bar abon acelbezanu eleeti ŋume o Joowo. <sup>21</sup> Baale abor Jooi ɔl o Juz baal een bor onin ele e giye calaŋ atuwi niigi Yesu. Aniyu zin ne, Mā alaŋ buk niiga atuyu Yesu, alaŋ buk koca Jooi abornuŋ igeet nɔkɔ? <sup>22</sup> Kaga zin naaga Jook vɔɔr ziniz, ma bodo avaraciz. Avaraciz niini ole o abor ŋaati atuwi nɔɔnɔ, ma vɔɔr ziniz ole o atu nɔɔnɔ. Zin mā alaŋ amenaku gɔl onin, aburnuŋ koca niini igeet buk. <sup>23</sup> Mazi abada ɔl o Juz, ma avu atu Yesu, anyek koca Jooi nɔɔgɔ bodo kiziti bor cin, eeci anyak niini ɔyiz ci agɔɔni nɔkɔ labak. <sup>24</sup> Kaga naaga gi nici een didi giye o anyaaŋuy Jooi igeet ɔl o alaŋ eeginu Juz ɔyize onin ivita iziti bor cin. Buk baale Jooi ɔyize nico anyek ɔl o Juz baal een bor onin e keelit kiyo modena o. Zin gole nico kaga naaga buk anyak niini ɔyiz ci ŋaan abadaan bodo nɔɔgɔ kiziti bor cin labak.

#### Awucnek katin Jook ɔl o Juz

<sup>25</sup> Gɔtɔnɔga o tuwento, karooŋnyuŋ agaac zɔɔz ci adiŋɔŋ ɔrɔt aku Joowa ce, ka calaŋ adoŋnyu eleeti. Alaŋ tiŋeere ɔl o Israyil amena abor zɔɔz o Joowo kodot. Olla anyek rak Jooi oogi ŋaatineeŋ kotoborit zɔɔz onin zɛe ma avunak ɔl o alaŋ eegin Juz aŋeryai dook Jook, ma arogze. <sup>26</sup> Ka zin vurta kivita korogozte ɔl o Israyil dook. Kiyo azi Jooi waragewe onin ne, “Aku tiŋeere ruguzoiti kuture o kazi Jerusalem ka kiiya kabadai dɔl ci dɔl o Jakob gole o oŋenu kivitak gɔl onan. <sup>27</sup> Kaara waanma nɔɔgɔ oŋe ugeec kiyo katerkedi noko.”

<sup>28</sup> Ma giye o otoborti ɔl o Israyil kaviyak o Joowo abon, amarto niigi kibeen Jook. Agooni zin gi nici o ka ojokta niiga ɔl o alaŋ eeginu Juz waŋi ci ka orogti Joowa. Bar zin giye baal eŋera Jooi ɔl o Juz kiziti bor cin, ŋaan areez niini nɔɔgɔ nɔkɔ zɛe been inoko o zooze baal aterkedek niini jijitigeec laadun e. <sup>29</sup> Eeci Jooi laadun mā uduwa gi cin, alaŋ bodo abali been neen. Abil zin nɔkɔ ole o amayuun niini, ma eŋera niini nɔɔgɔ kizi ɔl cigin. <sup>30</sup> Baale rak ɔɔwa e niiga ɔl ween moden alaŋ azoonu zoowok o Joowo, ma bar inoko uwuceyu niiga Jook, eeci ɔl o Juz alaŋaan arɔɔŋ kagamta zɔɔz onin. <sup>31</sup> Inoko zin giye o otoborti niigi Jook, uwuceyu niiga Jook. Awucnek zin buk bodo waanma niigi Jook nɔkɔ. <sup>32</sup> Anyek Jooi ɔl dook keelit kiyo ɔl o acabje o giye o alaŋ animni niigi kuzuuti lotinok ogin, eeci arɔɔŋ niini ka keyelizak nɔɔgɔ gi o awucneke niigi dook nɔɔnɔ.

#### Abon kanaat Jook

<sup>33</sup> Icinit di Jook ŋaati anyayi mayuwenet ci appe ɔrɔt. Ma buk ageny niini ɔrɔt ele, ma aga kaal dook. Akɔm eet ci aga baabaninok ci Joowo been kaal cigin agɔɔn nɔkɔ been neen. <sup>34</sup> Kiyo ayeedi waragewe o Joowo gi ci azi ne, “Ŋeneen ci anim kaga baabaninok ci Joowo? Akɔm kina! Ŋeneen ci anim kitilo nɔɔnɔ? Akɔm kina! <sup>35</sup> Ŋeneen ci anim kanyek Jook gi ci anyek ka bodo iima kacaca Jooi kanyek buk nɔɔnɔ gi ci anyek? Akɔm kina?”



<sup>36</sup> Eenyca Jooi kaal dook, ma anyek nōōgō korogit, ma azooni nōōgō dook dōyize onin kizi kaal cigin. Abon zin kadiŋđiŋan naaga dook nōōnō nōkō kodot. Nōōnō nēen.

#### Baayiz o abon abaai eeti ci ano Jook

**12** <sup>1</sup> Gōtōnōga o tuwento, inoko zin giye o kawucneke naaga Jook, kilalekuŋ igeet ka anycek eleeti ugooc dook nōōnō. Abon eelnu kiyo todayoiti o aŋeryai ka tiŋeere kutuguwozek Jook o. Anycek eleeti ugooc dook Jook ka katalō niini ŋaatunooŋ. Nici gōl zin o abon adiŋđiŋanu niiga Jook nēen. <sup>2</sup> Má abaaku baayiz ci abaayi ɔl ci loocu noko, bar anycek Jook kabali zinzeeti ki baabanok ugooc ka iziti ɔl ci colai ci aŋorowonu ki ɔl o loocu. Mā agoonu nōkō, agayu koca kaalyan o arooŋek Jooi ɔl ogin kutuguzō. Ma kaala nica kaal ci abon azimnyai ɔrōt, ma anyek Jook katalō.

<sup>3</sup> Zin giye o anyan Jooi aneet kizi toonnyai cin bonate onin, kanekuŋ igeet dook ne, Má adoŋnyu eleeti aniyu ne, Keegina titinye. Bar abon gōon eeti ce aŋaamnek ele onin maany gole ci abon. Abon gōon ayabiz eeti ce titinyon o ele onin tuwente o anyek Jooi nōōnō, karabōŋ anyek Jooi nōōnō tuwen ci appe, karabōŋ een tuwen ci miliny. <sup>4</sup> Agayu ri niiga ele ci eet ci deer o adoye ɔr nōkō, bar alye nico ele anyak viten ci meelik ger. Ma vitena nicigi dook anyak gōn ce liŋliŋon cin doon. <sup>5</sup> Keel buk zin naaga nōkō. Ma naaga dook o koromtozek Kiristo, yo nuun keegin meele o, koromte naaga dook kodoye ɔr nōkō ŋaaten Kiristo. Keelit naaga kiyo vitena o ele codoi o. <sup>6</sup> Olla zin aŋerek Jooi ɔl ogin dook dōyiz kizi ilinya ka kutuguzi niigi liŋliŋon onin. Abon zin gōon eeti ceeni ŋaatina dook aliŋliŋonek Jook dōyize o anyek Jooi nōōnō. Mā anyek Jooi eet dōyiz ci ka kuuwayi zōz onin, abon uuwak zōz nico tuwente onin dook. <sup>7</sup> Má anyek Jooi eet dōyiz ci ka kitiriti gōnōgi oogi, abon atirit niini nōōgō juruŋ. Má anyek Jooi eet oma dōyiz ci ka kedemezi gōnōgi, abon ademeze niini nōōgō juruŋ. <sup>8</sup> Má anyek Jooi eet dōyiz ci gōon ka kidiziyeye gōnōgi oogi zooze o Joowo, abon adizkek niini nōōgō juruŋ. Má anyek Jooi eet dōyiz ci irkene, abon anyek niini ɔl kaal zinize onin dook. Má anyek Jooi eet alaazet, abon abal niini ɔl juruŋ zinize onin dook. Má anyek Jooi eet ziniz ci awucneke nōōnō ɔl ci apirna, abon atirit niini nōōgō talniinta.

<sup>9</sup> Ereezō niiga zinzeetine ugooc rēezōnet ween didi. Otoborit kaal o ger dook. Agamit kaal o abon zinzeetine ugooc dook. <sup>10</sup> Ereezō niiga dook ɔrōt, eeci izitu niiga dook gōtōn tuwenta ŋaaten Kiristo. Abon gōon eeti ceeni atitiny gōnōgi oogi kujuk ele onin. <sup>11</sup> Iliŋliŋit ɔrōt dōyize unooŋ dook. Má anyeku kadaaktuŋ eleeti. Utuguz liŋliŋon o Joowo dōyize o anyuŋ igeet Vōŋizi onine. <sup>12</sup> Ma giye o areyu niina kaal baal aterkedekuŋ Jooi igeet e, abon atalninu. Anycek zinzeeti kalalit, mate gōon apirnanuŋ kaal ci loocu. Ijinit Jook iinya dook. <sup>13</sup> Má anyak kaal ci anyaku, itiritit buk niiga gonogu o tuwento amaati. Atalta keerōn korogjowe ugooc.

<sup>14</sup> Ijintek Jook ɔl o gōon agiduŋ igeet ka kamayuk Jooi nōōgō. Má bar atoryu nōōgō, bar olla ijintek Jook ka kamayuk niini nōōgō. <sup>15</sup> Má atalne ɔl, atalta buk niiga been nōōgō. Má alu ɔl, utuluz buk niiga been nōōgō. <sup>16</sup> Oromte niiga eleetine ugooc baayiza zinzeetine ci vōrik. Má adoŋnyu eleeti, bar iliŋliŋit liŋliŋonok dook. Mayo nuun een liŋliŋon ci celbez, iliŋliŋit labak. Má agoonu eleeti iziti ɔl ci agenyu agayu kaal dook.

<sup>17</sup> Má agoonekuŋ eeti oman igeet gi ci ger, má acacanu giye ci ger. Bar utuguz kaal ci abon ci aga ɔl dook didi kaal ci agoonu niiga o kaal ci abon. <sup>18</sup> Atamanit dōyize unooŋ dook gōl ci abaaku been ɔl dook yaak. <sup>19</sup> Lanotigan o kareezuŋ, má acacanu kaal o ger agoonekuŋ ɔl been nēen. Otonit labak. ŋaan acin nōōgō Jooi doon bornet noŋe onin. Eeci ayeedi waragewe o Joowo zōz ci ane Jooi ne, “Aneet nēen o ŋaan kacaca kaal o ger agoonekuŋ ɔl igeet.” <sup>20</sup> Azi buk waragewi o Joowo ne, “Mā adak eet ci amarninin magiz, anyek nōōnō dayiin labak. Buk mā aruk nōōnō kōr, anyek maam kowode labak. Eeci mā agoonei niina nōōnō kaal nicoko nōkō, aam tedec nōōnō alyaani kaale o ger baal agoonekin niini ineet e.” <sup>21</sup> Má anyeku ɔl o agōon kaal o ger komoktuŋ igeet, bar omogit niiga nōōgō ŋaati agooneku nōōgō kaal ci abon.

#### Abon ɔl dook azii zōz ci alaati o abal looc

**13** <sup>1</sup> Abon ɔl dook azii alaati o abal nōōgō, eeci akōm eet ci anyek ele alaazet niini doon mā alaŋ anyek nōōnō Jooi. Jook nēen o anyek ɔl alaazet. <sup>2</sup> Zin mā abor eeti ŋaati aziŋni zōz ci ɔl o abal nōōnō, otobor koca niini buk zōz o aricaneket Jooi. Ma ɔl ci apez alaati noko, apayek tiŋeere Jooi nōōgō gerzitin. <sup>3</sup> Ma alaata ole o agōon kaal o abon, alaŋ gerze. Bar zin gerze niigi ole o agōon kaal o ger. Zin mā arooŋnyu abaayit kibeen alaati yaak, abon agoonu niiga kaal ci abon ka katalō niigi ŋaatunooŋ. <sup>4</sup> Ma ɔl ci abaluŋ igeet o niigi gabara ci Joowo. Ma aliŋliŋ niigi liŋliŋon ci ka kitirituŋ igeet. Zin mate gōon abacanu kaal ci ger, abon aŋolinu nōōgō, eeci anyek Jooi nōōgō alaazet ci apayekuŋ igeet piryakzet labak. Niigi gabara ci Joowo, ma anyek Jooi nōōgō dōyiz ci ka kegerenyeye ɔl o gōon agōon kaal o ger. <sup>5</sup> Zin giye nico abon ɔl dook azii zōz o alaati o abal nōōgō, eeci mā alaŋ aziŋnu niiga nōōgō, abor koca Jooi noŋ, ma apayek gerzitin ɔl o alaŋ azii nōōnō. Alaŋ zin bar buk een gi nico doon, bar eeci agayu buk niiga zinzeetine ugooc maany nōkō kaal o abon waan agoonu.

<sup>6</sup> Nici zin gi o gōon abon aruku buk niiga meeri o nēen, eeci alaata o akumawo dook gabara ci Joowo, mā aliŋliŋ niigi liŋliŋon cineeŋ anyek Jooi o juruŋ ŋaati aloti meeri. <sup>7</sup> Abon zin aruweku nōōgō kaal o arōŋ niigi ŋaatunooŋ. Má arōŋ niigi ŋaatunooŋ meeri, uruktek. Abon buk niiga aŋolinu ɔl o agano ŋaati aŋolinu, ma abon adiŋđiŋanu ɔl o agano ŋaati adiŋđiŋanu.

#### Abon ɔl o tuwento areezō

<sup>8</sup> Má adomanu ŋabolet ɔla been nēen. Bar olla anyak gi codoi ɔr nōkō ci abon agoonu, niiga iinya dook. Abon areezonu niiga dook. Eeci eeti ci areez gōnōgi oogi, ozooti niini lotinok o Joowo dook. <sup>9</sup> Lotinok zin baal aduwa Jooi e nēen ce. Má adoma zocmaz. Má amuny eet ci deer. Má agōze. Má anyi ziniz kizi appe kaale culu. Iiya zin oromnyai lotinowa nicigi dook kōdōwe ɔr nōkō lotinte o azi ne, “Reez ɔl dook kiyo areez ele unun maany o.” <sup>10</sup> Má areez eeti ɔl dook, alaŋ bodo agoonek niini nōōgō kaal ci ger. Zin mā areez eeti ɔl, ozooti niini lotinok o Joowo dook.

<sup>11</sup> Abon zin ooryunōŋ utuguz kaal nicoko dook taman. Iziti vilile ɔrōt, eeci iiteni o ka kuruguzet Jooi ageet izi aŋon ɔrōt ele kujuk iiten baal kagaman naaga Yesu ɔwa e. <sup>12</sup> Inoko ŋaan keel naaga kiyo kaavtiz muura o. Bar zin tammu alizi o ka kanyaa vooritin izi aŋon. Abon zin naaga kooŋ kaal o ger gōon agōon ɔl muura, eeci keegin naaga ɔl ci vooritino. Kabaayit zin baayiz ci abon dōyize o Yesu Kiristo. <sup>13</sup> Abon kabaak baayiz ci abon kiyo ɔl o aavtiz vooritine o waazinu o. Alaŋ abon ŋaati kavōyi lotente ci kawodi nyaantane ka kabaakte. Ma alaŋ abon ŋaati kagōoni waŋ, karabōŋ een gi ci olla akati waŋ. Ma alaŋ abon ŋaati kayōwōn kibeen ɔl, karabōŋ appinte zinzeeti kaale culu. <sup>14</sup> Bar abon areku niiga dōyiz o Manyi onai Yesu Kiristo zinzeeti ugooc ka abaayit baayiz ci abon, ma abon oonnu kaal o ger gōon abaabanu, ma arōŋ eleeti ugooc.

## Má apayeku gonogu o tuwento gerzitin

**14**<sup>1</sup> Maanyak eet ci atu Yesu Kiristo mayo nuun ñaan kidic tuwen cine o, atalta ñoono reezinta labak. Má adañonu ki ñoono kaale ci abaaban niini. <sup>2</sup> Eeti oman atuwe ma olla adak kaal dook labak, maje bar eeti ci kidic tuwen cine anyak kaal oogi ci abor niini. <sup>3</sup> Mazin eeti ci atuwe, ma olla adak niini kaal dook o, alaṅ abon ṅaati apezi gɔn ci abor ṅaati adayi kaal oogi o. Ma buk eeti ci abor kaal oogi o, alaṅ abon ṅaati apayeki gerzitin gɔn ci adak kaal dook o, eeci alaṅ abor ñoono Jooi. <sup>4</sup> Ma niina ineet ṅeneen ci ka payek gabaren ci eet oma gerzitin o? Zin bar alaan o gabaren nico doon o ka kapayek ñoono gerzitin, karabɔṅ een bonat. Mazin gabarenti nici aruwek niini zɔɔ looc kutugu kaal ci abon tup dɔyize o anyek ñoono Manyi Kiristo.

<sup>5</sup> Azi gɔɔn ɔl ogene ne, “Adiṅṅi iinya ogen kujuk iinya dook.” Maje ɔl ogen azi ne, “Atobɔ iinya dook nɔkɔ.” Abon zin gɔɔn eeti ceeni aruwek zɔɔ looc giye o atu niini. <sup>6</sup> Ma eeti ci anyek iiten codoi kidiṅṅi agɔɔn niini gi nico o ka kidiṅṅani Manyi. Eeti ci adak kaal dook labak o adiṅṅan buk niini Manyi giye nico, eeci anyek niini Jook zany kaale o adak. Ma eeti ci abor ṅaati adayi kaal oogi o adiṅṅan buk niini Manyi gole nico, ma anyek Jook zany kaale ci anyek Jooi ñoono kadak o. <sup>7</sup> Akɔm eet ci arogi giye ci ele cin doon. Ma buk akɔm eet ci adaai giye ci ele cin doon. <sup>8</sup> Mā karogi, karognek naaga Kiristo. Mate kadaai, ṅaan ni buk kavɔ ṅaatin. Zin mayo nuun karogi, karabɔṅ kadaai, ṅaan ni keegin naaga ɔl cigin nɔkɔ. <sup>9</sup> Eeci Kiristo iya adaak, ma bodo itiṅa daayiza ka kizi niini Manyi ci ɔl o arogi been ɔl o adaai buk.

<sup>10</sup> Alaṅ abon ṅaati apayeke niina gotonu gerzitin, karabɔṅ apez ñoono. Eeci naaga dook kare payiin o ka kook kapaket Jooi ageet katin. <sup>11</sup> Ayeedi waragewe o Joowo zɔɔz ci ane Manyi ne, “Giye o karogne, agɔlakan katin ɔl dook aneeta, ma avu akani kozɔṅti looc aneet ṅuma, ma adiṅṅanan niigi aneet kagayan keen didi Jook neen.” <sup>12</sup> Keel zin katin iitene nice naaga dook ṅume o Joowo, ma kaduwak ñoono kaal o abon kibeen kaal o ger baal gɔɔn kagɔɔn loota ṅina e dook.

## Abon katirtɔ naaga maany tuwenta

<sup>13</sup> Ma ṅaan zin bodo apawonu niiga maany gerzitin. Má anyeku gonogu o tuwento kutuguzɔ kaal ci amiirene ñooṅo kivurut tuwente uneeṅ, makacin abaca oṅe. <sup>14</sup> Ma naana o koromtewa ki Kiristo kaga ɔɔɔt akɔm dayiine dook ci ger ṅume o Joowo. Bar zin mā acin eeti dayiin ci kizik ṅaatin gerze ṅume o Joowo, abon ooṅ niini dayiin nicoko. <sup>15</sup> Mā anyak dayiin ci abor gon oman, ma adaku ṅaati aave niini tɔ, alaṅ koca didi areezu niiga ñoono. Má adaku zin dayiin ci abor niini o ṅaati aave niini tɔ gerze ṅaan uulalu tuwen cin o, eeci Kiristo adaai buk eete nico. <sup>16</sup> Mayo nuun gi nici abon ṅaatonooṅ, abon uuṅnu labak ka calaṅ azoozuṅ ɔl igeet gerze. <sup>17</sup> Eeci baliin o Joowo alaṅ akati dayiin, karabɔṅ een kaal ci kawot. Bar akati bonat ci kabonan ṅume o Joowo ki ganɔn been talniin o aku Vɔṅize o Joowo. <sup>18</sup> Mā aliṅṅonek eeti Kiristo gole nico, atalne koca Jooi ṅaatin, ma buk koca aga ɔl ñoono agɔɔn niini gi ci abon.

<sup>19</sup> Abon zin gɔɔn tup nɔkɔ kagɔɔn naaga kaal ci abon ci anyet ageet kabaayit kibeen ɔl yaak. Ma buk anyek keteenyit tuwen ona kɔdɔk. <sup>20</sup> Má uulalu tuwen o areke Jooi gonogu oogi zinzeeti ugeec ṅaati adaku dayiin ci abor niigi. Ṃedet didi dayiin dook abon labak ṅume o Joowo, bar zin gerze ṅaati adaku gi ci anyek ɔl oogi kokolozte gole o Joowo. <sup>21</sup> Gi ci zin abon agoonu ce. Mā anyak gon ci abor idiṅ, karabɔṅ een nyaan, karabɔṅ een dayiin oogi, otoṅit buk niiga labak. Má agoonu gi ci anyek ñoono kimiire ki vurut tuwenta. <sup>22</sup> Mā anyak gi ci agayu abon kaale nicoko, anycek kizi gi cunooṅ ki Jook doon. Amayuk Jooi eet ci agɔɔn gi ci aga niini gi nici abon ṅume o Joowo. <sup>23</sup> Mā abaaban eeti dayiin oogi kizik ṅaatin gerze ṅume o Joowo ṅaati adayi, ma bar bodo vurma adak dayiin nicoko, odoma koca niini oṅec Joowa, eeci alaṅ adake niini tuwenta. Mā kagɔɔn gi ci kagɔɔn zinize calaṅ kanyayi tuwen, kabaca oṅec Joowa giye nico.

## Utuguz kaal ci atal gonogu o tuwento

**15**<sup>1</sup> Ma naaga o kutuyɔ juruṅ abon buk katirit ɔl o ṅaan kidic tuwen uneeṅ. Alaṅ abon ṅaati kagɔɔni kaal ci katalnin naaga doon. <sup>2</sup> Bar abon gɔɔn eeti ceeni ṅaatinai agɔɔn kaal ci atalna gɔṅgja o tuwento ka kitirit niigi ñooṅo kanyek tuwen uneeṅ kɔdɔk. <sup>3</sup> Eeci Kiristo alya ṅaan kutugu kaal ci atalnin niini alye onin doon. Kiyoo ayeedi waragewe o Joowo zɔɔz ci akati Kiristo azi ne, “Dominet o adomnyin ɔl ineet Jook iyyayan bar aneet.”

<sup>4</sup> Ma kaala o ayeedi waragewe o Joowo dook ayeedi ka kedemeztet ageet zɔɔz ween didi, ka kereec naaga kaal o aterkedeket Jooi ageet zinzeetine ci alal ki tuwenta. <sup>5</sup> Abon bai Jooi o anyet zinzeeti laliz been tuwen o adɔi, atirituṅ igeet buk ka kodoye zinzeeti ugooc kibeen baabani giye o anuyu niiga baayiz o Yesu Kiristo. <sup>6</sup> Ka zin niiga dook anaatit Jook ween baati Manyi ona Yesu Kiristo zinzeetine ci adoye.

## Kanaatit Jook naaga dook

<sup>7</sup> Abon atalnanu niiga dook gonogu o tuwento reezinta kiyo buk iiten baale atalnanuṅ Yesu Kiristo igeet e, ka katanaazɔ ɔl dook Jook. <sup>8</sup> Aku baale laadun Kiristo e ka kiiya kizi gabaren ci atirit ɔl o Juz gole ci ayeleke ñooṅo zɔɔz o Joowo baal aterkedek Jooi jijiṅgeec e ibil didi tɔ. <sup>9</sup> Ma buk aku niini ka kanyek moden o alaṅ eegin Juz katanaazɔ Jook giye o awucneke niigi ñoono. Ayeedi waragewe o Joowo zɔɔz ci azi ne, “Ṃaan kanaati zaar ugun modene o alaṅ eegin Juz dook kɔrgena. Ma ṅaan buk kanaati zaar ugun beniinowe.”

<sup>10</sup> Bodo buk azi warage o Joowo ṅaaman ne, “Niiga modena o alaṅ eeginu Juz, ataltɔ buk niiga kibeen ɔl o Juz aṅera Jooi.”

<sup>11</sup> Ma azi bodo buk warage o Joowo ne, “Abon niiga modena o alaṅ eeginu Juz anaatu Jook. Anycek buk ɔl loocok dook katanaazɔ ñoono.”

<sup>12</sup> Azi buk baale Izaya ne, “Aritai katin dole ci dɔl o Jesi. Ma aku ka kiiya kabal moden o alaṅ eegin Juz. Ma are katin modena dook tuwenta rogzen o ka kiiya korogozi niini ñooṅo.” <sup>13</sup> Abon bai Jooi o anyet ageet dɔyiz o karewi kaal dook tuwenta, anyuṅ igeet anyayit talniin been ganɔn ci appe zinzeetine ugooc giye o utuyu niiga ñoono. Ka zin tuwen unooṅ kazaace kizi appe dɔyize o Vɔṅiz onin.

## Aduwa Pɔl zɔɔz ci liṅṅon onin anyek Jooi

<sup>14</sup> Gɔtɔṅga o tuwento, kagayuṅ naana igeet abonanu golowe dook ɔɔɔt giye o agayu zɔɔz o Joowo een didi juruṅ, ma animnyu edemeztɔ niiga maany. <sup>15</sup> Bar zin waragewe nico anyak zozok oogi ci kayeedekuṅ igeet moozeta, ka calaṅ areyekuṅ kaala baal kuduwayuṅ rak e. <sup>16</sup> Kagoon nɔkɔ o, eeci eṅerawan Jooi aneet ka kuwayek zɔɔz o Yesu Kiristo moden o alaṅ eegin Juz. Ma

liŋliŋonti ci kaliŋliŋ naana o abil kiyo o alaan o gɔɔn anyek Jook taabinet o. Zin naana kuuwai kaviyak o Joowo abon o ka ɔl ween moden keelit kiyo todoyoit o abon kataabi Jook, ma atalna niini o. Agama zin Jooi nɔɔɔ o, eeci iziti niigi ɔl cigin dɔyize o Vɔŋiz onin.

<sup>17</sup> Ma giye o koromozeke naana Yesu Kiristo, katalne liŋliŋonte o kaliŋliŋoneke Jook ɔɔɔt. <sup>18</sup> Karooŋ zin kameda kinim kɔɔɔ moozeta kaal o agɔɔn Kiristo ŋaatan ka kanyaa ɔl o alaŋ eegin Juz kiya kuzuuti zɔɔz o Joowo, ka kutuweec niigi Jook zooze o kaduwai naana nɔɔɔ ki kaale o abon kagoon, <sup>19</sup> ki dɔyize o kaal o ateet ɔl biye, kibeen dɔyize o Vɔŋiz o Joowo. Kɔɔɔba ni baalyo loocok ŋaati kuuwaye kaviyak o Yesu dɔyize onan dook kakana Jerusalema zee been Ilirikum. <sup>20</sup> Karooŋ gɔɔn laadun naana tup nɔkɔ gɔl ci kakɔ kuuwaye kaviyak o Yesu vitenane o ŋaan akɔm eet oma ci ook uwayek ɔl kaviyak ogin. Alaŋ karooŋ kilinliŋ ŋaati iziikti ɔl zɔɔz onin laadun. <sup>21</sup> Kiyo ayeedi waragewe o Joowo gi ci azi ne, “Tiŋeere ɔl o ŋaan kuduyak nɔɔɔ zɔɔz o Yesu, ŋaan acin niigi nɔɔɔ nuun. Ma buk ɔl o ŋaan kiziiyt kaviyak ogin laadun, ŋaan azii tiŋeere, ma aga nɔɔɔ.”

#### Arɔɔŋ Pɔl kidiir Rom

<sup>22</sup> Gi ci zin gɔɔn laadun alamnyan aneet tup ŋaati karooŋ kiiyakun igeet Roma o neen liŋliŋonti nici. <sup>23</sup> Inoko zin kidica liŋliŋon ŋaato. Kɔɔɔŋa zin ka kook kicinun igeet ŋinaante ebaal laadun karooŋe e. <sup>24</sup> Inoko zin karooŋ keeron kook looce o kazi Ispen. Mazi tiŋeere kiŋaaz, kakɔ rak kadiiryun igeet ka kook kazaawun. Ma kamon rak ŋaatunooŋ ŋintimiliny ka katalto naaga dook ŋaatodoi. Ka zin enice itiritan icinteyan gɔl ci ka kooyi looce ci kazi Ispen e.

<sup>25</sup> Maje rak inoko o kakɔ Jerusalema ka kook kitirit ɔl o Joowo ŋinaante. <sup>26</sup> Kakɔ rak Jerusalema o, eeci ɔl o tuwento abaak Masidoniya been o abaak Gariz ŋaato uluta guruc ci ka kitiriti gɔɔŋi o tuwento amaar Jerusalema. <sup>27</sup> Agɔɔn gi nico niigi zinzeetine ugeec doon. Ma didi gi nici gi ci agano ki nɔɔɔ ŋaati agɔɔni. Eeci ozolit buk niigi ween moden kibeen ɔl o Juz kaal baal aterkedek Jooi Juz doon e. Abon zin buk modena o alaŋ eegin Juz azɔl kaal ugeec anyak been ɔl o Juz. <sup>28</sup> Inoko zin tiŋeere ma kuruma Jerusalema, kakɔ kanyi ɔl guruc ci baal alotak nɔɔɔ ɔl ceen moden noko, ka zin enice kitiŋa kook kidiiryun igeet ŋaan rak kidicek kook Ispeniya. <sup>29</sup> Kaga zin buk tiŋeere ma kook kurumnyun naana igeet ŋinaante, ŋaan amayuket Yesu Kiristo ageet dook ɔɔɔt.

<sup>30</sup> Gɔɔɔnaga o tuwento, kilalekun igeet zaare o Manyi ona Yesu Kiristo been reezonte o aku Vɔŋize onin ka aŋaruyozeyan ɔɔɔt. <sup>31</sup> Ijinteyan Jook ka kuzuutan ole o alaŋ atuwe abaak looce o Juz ŋinaante. Buk abon ajinu Jook ka kagamta ɔl o tuwento Jerusalema kaal o tirtento kanyowonei naana nɔɔɔ talniinta. <sup>32</sup> ŋaan zin enice kakunakun talniinta, mate arooŋnyan Jooi kook ŋaatunooŋ, ka kɔɔt katalto naaga dook, ma kayubuz ŋaatunooŋ ŋinaante. <sup>33</sup> Abon bai Jooi o anyet ganon aavi ŋaatunooŋ dook. Nɔɔɔn neen.

#### Azaa Pɔl ɔl o Rom

**16** <sup>1</sup> Kaduwakun ŋɔɔna ona kazi Vibi. Niini ŋaa ci abon ɔɔɔt. Inoko zin aliŋliŋ niini kanisa kuture o kazi Senkiya. <sup>2</sup> Ma ako arumnyun niini igeet ŋinaante, atalta nɔɔɔ jurun zaare o Manyi ona eo gɔɔn agɔɔni ɔl o Joowo laadun. Mā anyak gi ci arɔɔŋ ŋaatunooŋ, itiritit nɔɔɔ, eeci gɔɔn niini atirit ɔl ci meelik ger kibeen buk aneeta ele.

<sup>3</sup> Azaayeyan zin Parsila been Akila ween laŋotigan baal kaliŋliŋnya ki nɔɔɔ ŋaatodoi zɔɔz o Yesu Kiristo e. <sup>4</sup> Arɔɔŋ baale niigi kadaayitɔ ŋaatan ka korok naana iitene baal kaave noŋe o kol e. Alaŋ zin katalne ŋaatineen naana doon, bar atalne buk ɔl o alaŋ eegin Juz atuwe dook ŋaatineen. <sup>5</sup> Azaayeyan buk ɔl o tuwento gɔɔn avɔ alote ki nɔɔɔ korge uneen.

Azaayeyan buk Apanitas ween laŋo o kareez ɔɔɔt baal laadun akana tuwen ci atuwi Kiristo ɔɔwa looce o kazi Asiya e. <sup>6</sup> Azaayeyan buk Meri o gɔɔn aliŋliŋ ɔɔɔt arɔɔŋ kitiritun igeet. <sup>7</sup> Azaayeyan Andironikas been Juniyas ɔl ogan een Juz baal kacabina ki aneet e. Agayi niigi toonnyawe o Kiristo ɔɔɔt ele, ma buk baale arak niigi tuwen ɔɔwa ŋaatan.

<sup>8</sup> Azaayeyan Ampiliyatos ween laŋo o kareez tuwenta zaare o Manyi. <sup>9</sup> Azaayeyan Urbanus o kaliŋliŋnya ki nɔɔɔ liŋliŋon o Kiristo. Azaayeyan bodo buk Istakis ween laŋo onan kareez. <sup>10</sup> Azaayeyan Apelis o agayi dɔyizi o tuwen onin ŋaati Kiristo. Azaayeyan ɔl o cez o Aristobulus. <sup>11</sup> Azaayeyan Erodion ween borit onan ɔl o Juz. Azaayeyan buk atenok o Narcisus atuwe.

<sup>12</sup> Azaayeyan ŋaa o kazi Tirivana ki ŋaa o kazi Tirivosa been ŋaa ween laŋo o kareez tuwenta kazi Persis o aliŋliŋonek niigi Manyi ona. <sup>13</sup> Azaayeyan buk eet o kazi Ruvas o agayi volkoconte onin aliŋliŋoneke Manyi ona, been yaatin baal gɔɔn atiritan jurun kiyo keen ŋeerin o e. <sup>14</sup> Azaayeyan buk Asinkritas ki Velegon ki Ermas ki Patrobas ki Irmas been ɔl o tuwento arome ki nɔɔɔ dook. <sup>15</sup> Azaayeyan bodo buk Vilogos ki ŋaa o kazi Juliya ki Neriya kibeen ŋɔɔni ki Olimp as been ɔl o atuwe arome ki nɔɔɔ dook.

<sup>16</sup> Azaayɔ zin buk gɔɔn niiga reezonta zinzeetine ugooc dook. Azaayun buk ɔl o atuwe ŋaato igeet.

#### Ilot Pɔl ɔl o atuwe

<sup>17</sup> Gɔɔɔnaga o tuwento, kilalekun igeet ka egenyit ole o gɔɔn anyaa ŋerɔn, ma abaci ɔl gɔl o tuwento. Ademzek niigi ɔl kaal ci aŋɔɔɔ kibeen gɔl ween didi baal agamtawu niiga laadun e. Edeyai zin niiga ole nicoko. <sup>18</sup> Eeci ɔl ci agɔɔn nɔkɔ alaŋ niigi aliŋliŋonek Manyi ona Yesu Kiristo, bar aliŋliŋonek niigi eleeti ugeec doon. Azɔɔz gɔɔn niigi zoocok ci amadi ka kalabtai ɔl o alaŋ abaaban kaal ci ger. <sup>19</sup> Iziikun zin igeet ɔl dook giye o azuunu didi niiga zɔɔz o Joowo. Zin giye nico katalne naana ŋaatunooŋ ɔɔɔt. Karooŋnyun zin naana igeet agaac kaal o abon calaŋ bar agayu kaal o ger. <sup>20</sup> Zin Jooi o anyet baayiz o kabaai yaak ŋaan amok Loryen kataman ka orocek niiga nɔɔɔ looc.

Abon bai amayukun Jooi igeet ŋaatan Manyi ona Yesu Kiristo.

<sup>21</sup> Azaayun buk Timozii o kaliŋliŋnya kibeen nɔɔɔ ŋaato. Azaayun buk ɔl ogane een Juz kazi Luciyas ki Jeson been Sosopatar.

<sup>22</sup> Bodo buk naana Tertiyas ci kayeedei Pɔl warage cin noko kazaayun igeet zaare o Manyi ona.

<sup>23</sup> Azaayun buk Gayus o katikene kɔɔk onin, ma buk ɔl o tuwento dook ŋaato gɔɔn arumɔ ole cin o. Azaayun buk eeti o kazi Erastus o gɔɔn agam guruc o kuturo. Ma buk azaayun gɔɔna onai kazi Kartos. <sup>24</sup> Abon bai Manyi ona Yesu Kiristo amayukun igeet dook.

#### Anaat Pɔl Jook ŋaryiinta

<sup>25</sup> Abon zin kanyek Jook zany, eeci anyak niini dɔyiz ci anyeke zinzeeti ugooc kodoyit tuwente unooŋ, giye baal kakɔ kuuwawekun igeet kaviyak o Yesu kibeen zɔɔz ween didi baal aroodi, manjan kagawe kina tamma laadun e. <sup>26</sup> Inoko zin eyelizyai

zɔɔz nici waragenyaye baal ayɛɛt nyakananeta e. Arican zin Jooi o arogi kodot gi ci abon aziijni ɔl loocok dook zoozok nicoko, ka kutuweec niigi kaviyak ci abon noko, ma azooni.

<sup>27</sup> Katanaaz Jook o adoi ɣɔr nɔkɔ o anyak genyiz dook niini doon. Abon kadiɲɲan naaga dook nɔɔnɔ nɔkɔ zɛɛ been neen ɲaaten Yesu Kiristo. Nɔɔnɔ neen.